

海珊詩鈔上

文 明 書 局 發 行

史 地 用 書

增修 補註 正續歷代通鑑輯覽

中紙 紙

四十冊  
六十四冊

釋 清鑑輯覽

十二冊

清史紀事本末

八冊

白話中國歷史

二冊

白話中國地理

二冊

中華民國分道大地圖

一幅

中華民國大地圖

一幅

字

典

中華新字典

六冊

中華通俗新字典

一冊

中華攷正字彙

一冊

十四元  
三元  
二元  
六角  
七角  
七角

一元四角  
一元四角  
一角



海  
珊  
詩  
鈔

EAST ASIAN STUDIES

AUG 02 2001

YORK UNIVERSITY.

上海文明書局印行

JOHN J. HENNESSY

THE UNIVERSITY OF CHICAGO PRESS



海珊詩鈔卷一



清 烏程 嚴遂成著

昭君怨

畫圖尚自好。況逢華悅安。團團照明鏡。對面心相知。環佩聲寒月中語。琵琶學自入宮時。一彈絃扇怨。再彈玉釵歎。白草黃沙泣秋雁。臨行召入朝陽殿。當年君不見妾心。妾幸今朝見君面。見君面。死無憾。阿房鐘鼓多美人。三十六年長不見。

少年行

覆首紅韎韐。垂腰鐵裊襠。馬上瑟鼓邯鄲倡。迴身流星挾金彈。左右彈人中。人面聞道前山夜轉戰。坐馳萬里日始旦。手提糗糊月氏首。入奏鏡歌未央殿。男兒富貴須早致。凌烟丹青容易事。却笑南陽鄧仲華。封侯年已二十四。

艾如張

艾如張。小山下。叢薄旁。四以雉。求鳳凰。鳳凰去。來禿鶻。不儀其羽。有舌孔長。大章咸池韶濩。聲亂清廟明堂。脫鞬一鷹怒突目。桐爾栖。竹爾啄。竊據者。匪福。興問罪師。攫爾肉。踉踉蹌蹌。伊誰之屋。雌雌啗啗。雌雄六六。艾如張。禿鶻去。來鳳凰。

薤露

草蕭蕭。元猿哭。黃熊號。翩丹旄。咽碧簫。委而去。江之臯。四野無人塊獨處。此樓浮雲海流水。有知無知兮。我行行且止。天蒼蒼。海茫茫。絨書孤鳳凰。昔時兒女今成行。秋蘆不以為絮。春笋不以為饌。爾安爾寢。爾魂則傷。髑髏與語。風悲白楊。

君馬黃

君馬黃。臣馬黑。君馬黃。臣馬白。十二閑。一鳴斥。太行山。雪千尺。石角凌兢四蹄圻。誰汝顧兮德不德。君不見錦為韉。珠作勒。一片桃花好顏色。

猛虎行

天虎人。虎虎化。人人變虎。天道好還。爾腹毋鼓。鼓爾腹。春長戈。抨强弩。挾腰拔古食。爾肉君不見。裴將軍。一日殺虎三十一。又不見趙大夫。一日殺虎三十六。

善淫者鹿。善媚者狐。狼貪而狠。猿譎而狙。爾掩取之。予不爾辜。慎毋傷我民。傷我民。傷爾仁。我當訴之麒麟。爾知有父子。豈不知麒麟與爾為君臣。采入其阻。終年莫入我城府。灌莽蔽虧。遨遊樂土。推牙脫距。願爾子孫墮爾武。不搏不攫。幹爾蠱。

宿昇山寺



偶向空寮宿。閑巡壞壁題。松涼知月轉。花暝受煙棲。野鶴如人瘦。青山在屋西。鐘殘僧入定。隔浦一禽啼。

### 湖亭晚望

風慰湖光鏡面平。紅泥亭外雨初晴。雲開山少離奇勢。月上花多嘆息聲。人為蘋香臨水住。家無禾把捕魚生。此邦不作燈船會。岸樹藏烏不夜驚。

### 紫陽洞

一石為一峯。峰立石脾睨。團團混沌形。本無瑕可棄。天公乃剗刃。直入地之肺。刻中穹其外。索鑰啟扃閑。其底方以平。四壁謝塗飾。仰視釜倒覆。危不墮于地。凹處鍾乳潤。凸處劍鐔利。蓬鬆萬垂蓮。附麗絕根蒂。空洞足容人。人以千百計。有門僅半圭。如月食未旣。呀然口東向。吐納烟霞氣。此屋成天然。造物頗兒戲。惜哉近城囂。神仙所勿憇。吾無一椽瓦。詭欲牽船詣。譬之邠岐人。陶復陶穴意。

### 冷泉亭

兩三年一別雲林。亭子堆塵如許深。恠鳥呼風天忽冷。危峰到地晝常陰。石皆鐫佛失其性。泉亦灌田流至今。坐久渾忘嵐氣重。樹移濃綠上衣襟。

謁岳忠武墓

陰森宰樹罩靈旂。翁仲無言廟火稀。此地一腔埋熱血。何年二帝脫青衣。秋風殿廢銅駝泣。夜月江空白雁飛。草色斜連忠肅墓。相看城郭近都非。

韜光庵

古寺手可招。屈盤磴幽阻。斜衝竹縫行。寒翠生衣縷。擾擾雲無歸。脩脩禽自語。面勢得上方。一覽衆山舉。僧定不鳴鐘。松梢有殘雨。

萬松嶺弔宋故宮

嶺舊名鳳凰山

鳳凰一飛飛上天。萬株松影青連蜷。家居撞壞纖兒手。銅狄摩挲五百年。伯顏昔入臨安府。犢車再見青城禍。臣呼渡河帝渡江。形勝偏安計原左。天停三日伍胥潮。地發六陵楊璉火。君不聞西湖西。夜來石馬空中嘶。墓門長跼雙鐵像。剗肉已盡脂燃臍。又不聞葛家嶺。蟋蟀啾啾啼古井。汲芳收拾小排當。炙筌炭黑燈船冷。英雄悼良將。父老罵奸相。國家倒用生殺機。神州陸沉理固當。新亭對泣胡為哉。幽蘭轉眼院成灰。馬蹄踏踐起輦谷。冬青無樹無人哭。

重陽菴宋理宗酒氣



穆陵鬼慟冬青樹。荒菴猶記嘉熙事。丁當閤馬並承恩。經界推排權場置。芙蓉閣繞  
亭香闌。繩縵毆錢關撲戲。吳山九日報花開。法酒如池壓擔來。舞罷彩雲梨園名高處  
望。銀山十二候潮回。魚皮列甲長江岸。荆鄂烽烟眼零亂。納幣稱臣以捷聞。夜漏沉  
沉正懽宴。萬枝銀燭暖烘雲。白雁聲寒落天半。一傳再傳器不守。海陵魚腹逋逃數。  
傷心帝魄醉穹廬。竟作高車月氏首。空貽一笈寶龜僧。古意摩挲欸識仍。劫火真珈  
燒不盡。陰房伴照鐵燈檠。

### 梅花

誰教春信破寒來。江北江南幾樹梅。此品亦宜員外置。無花敢向雪前開。平湖煙散  
閒移櫂。小閣風徐數舉盃。佳趣箇中殊好在。始知凡艷是輿臺。

山家籬落兩三枝。特地欽歌不入時。老氣直教無我敵。清名頗亦畏人知。那堪薄俗  
輕描畫。祇向前賢大索詩。問影問形都不似。高樓玉笛莫頻吹。

數點東風天地心。春光今夜半晴陰。幾多味在有誰會。忽地香來無處尋。澹碧溪山  
僧入夢。昏黃烟月鶴知音。前生若問家何住。定□移根托上林。

便是無言絕可憐。更於我輩有深緣。澹雲微雨將春候。曲檻疎籬欲暮天。香遠每留

三日後開遲猶占百花先。相思總在人稀處。不引漁郎洞口船。

秋草

山翠凋零石髮稀。邊頭悵望寄征衣。斷霞古道無人過。寒雨空城有雁飛。南浦晚來波不語。西堂春去夢都非。踏青此後停遊屐。收拾裙腰六幅歸。

落葉

江南賦罷庾蘭成。枯樹無端感又生。憔悴如為垂老別。錚鏦易作不平鳴。李陵臺畔風多力。柳惲亭邊月半明。一樣婆娑生意盡。未須老泪灑金城。

和元栲栳山人十臺懷古

十首存九

姑蘇臺

北盟齊魯西破楚。越屬國也敢予侮。遊魂忽到甬勾東。臣吳沼吳玩掌股。花氣長圍響簾廊。不聞渡江打戰鼓。錦衣暗趁錦帆風。燈樹燒空漲烟縷。君王倚醉眼朦朧。麋鹿場中看歌舞。墓有槽尚未可材。夜烏夜夜啼荒臺。

朝陽臺

商於不割唐昧亡。大讐未報秦虎狼。那有閑心以色荒。朝朝暮暮登高唐。玉鸞珮飾



蘭澤芳。儵來歛逝神揚揚。斬石疏波封妙用。瑤姬不作人間夢。雲雨迷離空所思。主文謫諫王心動。目不見睫牆之東。嫣然一笑桃花紅。

### 章華臺

熊虔肘壁雄南交。小侯泗上爭來朝。鄭田周鼎亦細物。投龜詬天心何豪。新臺落成鬣長相。三休受賀登雲霄。拂墀搖珮競奏曲。德音那暇聞祈招。倉卒戈鋌興四族。訾梁師潰然丹逃。囚衣狼籍流漢水。乾谿鬼作饑烏號。青青楊柳秋蕭瑟。猶自迎風舞細腰。

### 戲馬臺

楚興三戶秦已亡。鴻門氣懾諸侯王。入關可以制天下。失策迺在歸故鄉。故鄉歸來號西楚。不知芒碭雲龍虎。王斗一聲碎亞父。眼中若屬今為虜。八千隊隊衣錦衣。猶向臺邊舞楚舞。楚舞未終聞楚歌。帳前四面漢山河。虞兮虞兮可奈何。可奈何。騅不逝。烏江走死彭城棄。依稀弦誦魯遺風。憑弔千秋寄奴帝。

### 歌風臺

狐鳴篝火蛇橫草。亭長手提一劍掃。京索滎陽百戰餘。難得生還見父老。鷄犬新豐

樂故鄉。萬歲千秋魂渺茫。酒酣起舞淚霑臆。風聲慘澹雲蒼蒼。四顧山河要人守。誅  
夸半出兒女手。宮中雉雉反九起。胡乃藏弓烹走狗。嗚呼鐘室之死冤最深。從赤松  
遊非本心。

### 望思臺

衛霍功成天馬出。祁連焉支積戰骨。煩冤鬼氣入深宮。假手胡巫蠱發掘。羽林忿忿兵  
小弄。壺闕惓惓書上謁。作臺有詔空所思。魂兮魂兮招不活。一生苦學長生訣。適嗣  
何人忍自割。博望魂遊苑草荒。鳩泉目斷湖水裂。人之愛子亦如余。方識人間有離  
別。母后偕死二孫從。茂陵夜夜鵲啼血。

### 銅雀臺

銅盤捧露將辭漢。周文心事人皆見。詎無私語屬阿奴。垂死慙慙聲色戀。濯龍樹血  
梨根傷。凭几分香淚數行。樓飛銅雀一丈五。總帳朝昏納歌舞。舞袖迴風歌遏雲。地  
下殘魂聞不聞。運移典午國改步。無復宮人守遺墓。風雨漳河愁殺人。漆燈夜闕西  
陵樹。

### 鳳凰臺



麒麟郊。椒龜龍沼。鳳不時出。乃凡鳥。車兒好事築此臺。坐攬千山萬山小。百戰旌旗化劫灰。六朝宮闕埋荒草。世事銷沉閱古今。人文流落知多少。白也青城骨不歸。金龜曲盡鳳凰飛。鳳凰飛去臺無色。白鷺洲寒弔江月。

### 凌歊臺

鴟尾西。鸞禾五莖。雀集華蓋雲亭亭。蠕蠕婆皇儻馬舞。層臺奏樂樂不停。長夜之飲不復醒。中篝之言不可聽。葛燈麻拂笑田舍。腹合生兒得甯馨。玉燭奄然奴已故。渠大黠鼻削其壘。三千粉黛哭失聲。群巫又掘殷妃墓。

穆堂師曰。貫穿諸史。發為偉論。宮商既諧。風神調暢。迴視吳公作。彌覺前賢愧後生耳。

東坡書院與允山禪丈夜坐

時東山和尚已示寂

愛與名僧對。廊陰浸碧池。竹非因月瘦。山不厭雲癡。暮氣鶴飛杳。秋容楓落遲。一聲清磬寂。正上佛燈時。

訪葉石林與葛魯卿莫彥平夜遊處

依然牛渚可揚舠。采石青山不斷青。今夜月明魚在水。澹無人影白蘋亭。

寄雉城鮑西岡明府

明府前宰長城解組十年復為此任

愛此五湖長。重移晷畫船。劉晨如隔世。張緒尚當年。山水無涯夢。鶯花未了緣。拂塵尋醉墨。依舊碧紗懸。

百里無多路。茫茫水幾灣。茶香羅隱室。花暗呂蒙山。四鶴援藤臥。三鷗啄翠還。北轅吾欲去。望斷暮雲間。

題冬心集贈金布衣壽門

名農錢塘人長髯工隸書好遠遊有大曰小鵲樊榭為作歌

一帙詩成手自刪。苦心孤詣破深艱。斯才不出雲霞上。相賞徒存松石間。變隸向誰遺大嗣。美鬢合自狎重環。只爭貞曜他年謚。逢着名山即便還。

南潯謝文若王蕙如過訪東園

午扉押簾春睡殘。客至忘却頭上冠。花氣襲衣艾納熱。水聲漱石琴絃寒。不損不益皇甫靜。應無應有江僧安。片帆挂樹告歸去。眼逐鷺鷥飛過灘。

題畫

一峯突而弁。白雲縈其趾。飛鳥之所沒。去天尺有咫。何人攜孤筇。星辰摘五指。下界聲不聞。龍掛珠簾水。



題沈操堂編修碧浪泛輪圖

吳興故水國。清遠玉湖最。涼篷載散僊。衝烟入香藹。一氣推頭青。平熨鏡面大。雲臥水聲中。山移葭影外。紅亭如曇花。一湧亂明昧。鷺飛不到處。天亞與水會。茭深披釣碣。樹小望車蓋。扣舷發清吟。湖風颯衣帶。疑有潭底龍。聲歎生蛟獺。波頭不敢興。月涼寂萬籟。

為周秀才振之題停車坐愛楓林晚圖

金烏貼岫飛。青女入林駐。蒼葉驚薄寒。秋在天盡處。誰歟中柴車。消搖此前路。得非行樂遲。母乃尋山誤。崦嵫憺將夕。殘霞沒孤鶯。昔賢亭埋輪。亦有坂叱馭。此圖意殊絕。何見聞來去。吾欲從之遊。雲封不得語。

題家刑部公所遺雙龍圖

六鼉鏡沒三山立。風吹舶趠天吳泣。兩兩屏障星模糊。逼視雙龍墨痕濕。刑部家亡勝國秋。百年彘器有誰收。兵火摧殘盜胔篋。舟移壑徙水東流。此圖不信有還理。龍之為靈昭昭矣。畫師畫龍通龍語。龍乎龍乎奈何許。人間好贖無天龍。龍今下天滕勝不如畫上僧繚壁。待汝飛鳴雷雨夕。

聞陳上舍授衣却聘書此勸之  
與余同膺改堂先生薦書

陳君有筆大如帚。伯英筋肉兼而有。  
書上舍工前無堅對何却走。葵削寶刀馬戶守。□  
書下逮搜林藪。幸逢推轂扶輪手。我試為君作鳴矢。燕築隄官齊九九。縱未成佛誇  
得果。一發姑且射。雙藪。車驅車驅莫迴顧。好向東門折楊柳。人言天上亦差樂。戲摩  
麒麟摘星斗。

同年薦樊榭孝廉納姬

誰與湖亭張水嬉。簾櫳細雨笛聲吹。牡丹紅淺青梅小。未覺尋春四月遲。  
姬湖人孝廉於四月

玉湖湖口小紅橋。兩漿撐來月上潮。絃管吹開雲一色。彩鸞此夜嫁文簫。  
中秋碧湖合歡  
犢車轅短塵梢長。擁髻還依時世粧。正值蓬萊人獻賦。燈前也誦魯靈光。  
時孝廉方應博學鴻

合歡扇罷理征鞍。黃葉秋林怯薄寒。臨去明朝姑小住。人言風信渡汪難。

吳興雜詠

有馬成三無馬成二。昔時沈公事吾農事。列卒鳴笳將安所置。  
沈慶之



竟陵子。天隨子。如兄如弟。茶寮是主。君不見華亭二陸最能文。一敗河橋鶴不聞。何如置園於顧渚。白首同歸老桑苧。陸羽陸龜蒙

玉華宮。茆茨下。數上書。動朝野。獬豸冠。胡為者。三斗芻。立仗馬。徐惠妃

女學士。女尚書。花蕊夫人班婕妤。給事禁中不如。生男惡。生女好。女如花。男如草。  
沈瓊蓮

### 病起東謝寒村先生

治病如治兵。命醫如命將。人盡號能軍。心巫術則匠。繫予苦炎熱。瘡鬼敢獻狀。喉焦咸陽火。腹漲桂林瘴。宜以水犀濟。而乃火牛抗。宗老幡然來。具大法眼藏。中虛知魯弱。外強見隨張。顛趾以出之。夜決黃河防。急攻除務盡。慎守養用壯。殭蠹竟餒葉。枯魚倏跋浪。現言鬼神力。攘功姑自誑。簫鼓羅酒漿。叢祠浩歌唱。

### 夏晚野酌

風岸柳林立。生衣涼不勝。月容荷宿鷺。烟避葦移燈。落瑣山無數。呼船水亦騰。夜分少眠意。過訪虎溪僧。

### 遊某氏廢園

依舊林扉枕水開。寂無屐齒叩蒼苔。鶯聲不管春風盡。花氣如愁暮雨來。入夜變魑  
羣竊據。隔牆絃管易興哀。梨園老去名姬嫁。都把繁華付劫灰。

甲辰紀遇

九月十一日報罷十  
七日恩榜發與焉

歸雁禁寒結隊呼。敝裘典盡酒腸枯。彭衙分拜三年賜。絳市爭傳六日蘇。未許溝中  
遺斷木。肯教網外漏明珠。蓬萊更有長生藥。風引船回採得無。

湖上夜坐

卵色鑑空天倒懸。衆山皆出湖無烟。夜深不放月歸去。移却竹床松底眠。

西子問答

牝鷄索司晨。龍聚殃箕服。臺上一鳥啼。安能召麋鹿。楣不獻亦亡。王其武用讎深溝。  
商魯間。稻蟹無遺族。歌舞何能為。坐以沼吳獄。坐以沼吳獄。我法如春秋。汝居苧羅村。王與勾踐讐。汝出苧羅村。王與太宰謀。何以  
無一語。乃賜鴟夷浮。何以有二志。乃從鴟夷遊。



海珊詩鈔卷第二

烏程 嚴遂成著

首夏由胥江泛舟至上沙

夏木千章指上沙。綠陰滿地燕無家。遊人正是傷神後。愁對風前夜合花。

蔣別駕芝岡招同費副使懷谷戴孝廉闇成上舍光林遊陸氏水木明瑟園二首

十畝無多地。到來如許寬。池深魚氣靜。樹密鳥聲歡。淺碧侵琴薦。輕陰護樂欄。小長蘆去後。山翠至今寒。

乞與天隨子。此間銷夏宜。堂虛雲不去。山近雨先知。種竹新成个。浮蘋亂吐絲。便無花亦好。況遇有花時。

題介白亭

遶亭三面水如烟。好是霏微釀雨天。滿袖蘋香將不去。夜涼輸與鷺鷥眠。

五人墓

起惜薪司盜國柄。表裡朋奸挾奉聖。羅鉗吉網踞北寺。一獄同文鈞黨盡。封疆案入

魏大中。吏部出餞吳門東。卧起三日聘以女。地下逢此行相從。刺天綬騎大聲吼。呼  
囚地擲銀鐺手。開讀未竟一傳香。蜚擁山崩負傷走。嗚呼荆軻聶政非丈夫。輕生一  
擲胡為乎。死利於國乃得所。五人髑髏血模糊。君不見飛星墮月恣驚啄。皇嗣殄絕  
主勢孤。內捺束甲偕鹵簿。免孫彪虎繁有徒。自有此舉駕帖止。劫漕危言其魄褫。明  
年真龍捧日飛。倒塌冰山滅禍水。迺知五人不死死猶生。一怒強踰十萬兵。豈惟東  
林借生氣。力扶天柱東南傾。普惠祠基鬼其宅。穹碑大字書姓名。行人下馬酌杯酒。  
神鷄墓木悲風聲。普惠祠即忠賢寢祠處毀以墓五人

### 毘陵天靜寺

陳後主沉后從場帝幸江都亂後渡江為尼於此名觀音貞觀初卒

寺門岑寂古苔斑。

聞說觀音此閉關。禱應佛經朝雨散。

為后時遇旱誦佛經以禱應時雨降

歌殘商女

暮燈閒。夢中不酌紅梁醞。世上誰憐苦竹灣。

苦竹灣在馬跡山下唐陸希聲詩世上何人憐苦節

淚漬黃絕蒙

葬地離宮十六草連山。

隋創十六宮於毘陵未臨幸而敗

### 殷淑妃墓

靈床殷琰婢。

妃彭城王義宣女或云殷琰家人從疑恕詞也

長夜有餘哀。廟據春秋立。形隨巫鬼來。含辛羊

志淚。作誄謝莊才。狼藉棺通替。他年墓道開。



瓜州

石城一二面。瓜字尚三支。白獺龍兒港。青烏杜母祠。帆稀沙漸長。雨暗笛頻吹。不見興平鎮。水楊柳四垂。

金山

江自西來萬里強。橫當一柱屹中央。生犀不敢燃溫嶠。古鎖誰能引李陽。樓勢鼇浮趨海近。山根劍削倚天長。老僧見慣風波惡。鐘鼓閑宵禮法王。

楊州春日

竹西自古繁華地。況是風光九十天。紅杏一枝春店雨。玉笙三疊夜樓烟。隔江燈影迷歌館。吹岸衣香過酒船。好夢撩人歸未得。拂城楊柳亂啼鵑。

尋迷樓遺址

澤葵依井榛塞隧。雨嘯風嗥見水魑。不見蘋蘩糊飛文。蕪城一賦傷心淚。興廢循環自古然。行人但說隋煬帝。帝亦磊磊英雄才。隔江親擒天子來。生男勿舉事矯飾。樂器絃絕堆塵埃。胡然征遼渡遼水。六合神城一朝起。戰骨如山盜如雨。我愛江都遊未已。錦衣挽士八萬人。珍輦騎兵五百里。十宮連綿西院西。大雷小雷珠懸藜。皆宮名

不移而具齊望幸。襄野七聖行當迷。就中最數水晶殿。細朶通天冠。揄遍春愁既解。

醉忘歸。名皆曲鳩頭鵲瑞雉尾扇。陳宮臨檻有飛僊。不聞殿脚女三千。三千隊外知多。

少。裸人為戲招姥媼。螢光代蠟夜通明。投籤不畜司晨鳥。休言叔寶無心肝。三十六

封書懊惱。可憐翻調安公子。往而不返宮聲死。人生死亦要揚州。醒來攬鏡已無頭。

到底殺於誰氏手。不得生封歸命侯。嗚呼獨孤諸公血化碧。何人再造隋宮室。龍舟

鳳舸削柿多。竟至取材撤牀簀。夢入鷄臺繞玉鈎。地下相逢清夜遊。粥鼓齋魚當棒嚇。

僧家占住摘星樓。摘星樓即遺址樓規千有五百丈。遺隍斷塹今無恙。月明不照九華池。柳

黯如垂四寶帳。此地兵衝南北交。背海面江一巨防。疏濠卑濩倚籌邊。李重進築

觀崇隆名甲仗。謝安築甲仗觀乃公辛苦策屯田。為爾平陳積糧餉。文帝屯田積糧餉於此黑色小兒

據洛口。汴水東流敵西上。江都雖好不如歸。略具威儀空藁葬。竹西歌吹聲漸稀。本

揭瓊花金主亮。瓊花被金主亮南侵時揭本而去其種遂絕

### 尋蕃釐觀遺址

雪葉隨風已北遷。空祠明月夜籠烟。興平一入無遺種。不見叢殘聚八僊。聚八仙花名後人以

此代瓊花者



玉勾井舊隆觀後上有花。玉勾洞下有砂。鳥篆雲章都不問。行人但弔玉勾斜。

### 淮安舟泊

時平淮戍罷屯兵。市屬王孫未易名。淮陰市尚在燈火如螢樓月暗。帆檣為幙島烟生。東

坡曾記沐猴戲。北使猶傳銀鑄城。四十二灣皆種柳。綠陰三面鏡中行。淮安三灣距水

娑羅葉黑稻花青。地為黃河夜不甯。浪大如山風雨勢。堤高於屋鉢盂形。淮有山名鉢盂借用

牌連泗口兼淮口。碑沒枚亭與步亭。俯仰古今發船去。惡聞海氣帶龍腥。

### 過徐州懷蘇文忠公

雲龍山曉墨亭秋。蘇墨亭坡公手蹟襟要朱方視此州。人慕項劉多霸氣。地交汴泗易橫流。

產鼃浸版危何甚。種柳環堤役漸休。後世但言公坐鎮。羽衣乘月飲黃樓。

公治徐禦水勞苦特甚過之者無得以黃樓一笛置之

### 過符離讀張忠獻公傳書後

北使來朝輒問安。隱然敵國膽先寒。十年作相遲秦檜。高宗問相公以檜閣對遂忤

興二年復相萬里長城壞曲端。采石一舟風浪大。富平五路戰場寬。傳中功過如何叙。為

有南軒下筆難。

誓師殉國志無他。失計其如再敗何。都尚可遷讐易復。公如不去議難和。風霜遠竄名逾重。斧鉞陳書忌者多。重過符離一回首。青燐白浪滿黃河。

### 烏江項王廟題壁

雲旗廟貌拜行人。功罪千秋問鬼神。劍舞鴻門能救漢。船沉鉅鹿竟亡秦。范增一去無謀主。韓信元來是逐臣。江上楚歌最哀怨。招魂不獨為靈均。

### 亞夫墓

墓在徐州元李賈胡發之得寶劍去虞伯生有詩紀其事

謾藏誨盜暴其骨。難起九原論劍術。此劍昔與鴻門宴。舞項莊兮蔽項伯。何不直前擊殺之。乃撞玉斗示玉玦。楚王醉兮漢王出。赤帝興兮白帝滅。從此歸彭城。怒癭為疽化異物。長眠一千五百年。賈胡直待到元末。嗚呼劍不利兮鴻溝割。有墓有墓亦不入鐘室。

### 寄戴卯君廉使蘇州

家山不遠一江分。花月金閨屬使君。可是釋之專治獄。每呼白也與論文。酒壚夢斷三生笛。時談及臧鄒侯韓怡國吳浣陵諸故人衣笥香消一段雲。喪偶不娶惟有平反勞母問。寶倫因果

### 結聲聞



晤孫葭遊有感

與余皆故少司寇王公門下士

十載重逢白髮新。師門回首暗傷神。宣風一路思慈母。觀風兩浙查賑中州皆有恩德捧日三朝識  
蓋臣。太學舉幡空往事。諸生稅服更何人。與君未語先垂淚。總是羊曇醉後春。

送副使芮師衣亭先生遊上海兼柬陸二袖壇

翦取吳淞去。蒼茫古意存。橫塘吟杜牧。廢壘阻孫恩。微雨不成響。長烟澹一痕。紅旗  
叢白柁。倚眺駱駝墩。

江灣四十。二開遍木棉花。封架沿沙尾。尊絲掙槳牙。潮聲如喚雨。曉氣易成霞。若問  
神仙事。荒涇漂斷槎。

芮芳齋歸自日本長歌紀事

都斯麻國睨羅東。邪靡堆踞樞原宮。七十二島如黑子。纍纍著面汗青銅。日竄月窟  
等荒服。天限弗與華夏通。芮君意氣輕萬里。慷慨破浪乘長風。海水一杯易與耳。不  
起而越非英雄。紅旗白柁舟穹窿。如鳥斯舉如張弓。前無厓嶺下崑崙。圖濤憑漢粘  
虛空。文魀孕瑇瑩。肺躍噓喋騎馬騰。倏蟪群妖邁。忤助饕虐蹴翻鰲。極馮脩聳。同舟  
聲嘶不得語。君乃大笑誇豪舉。秦王漢武所不到。身輕獨試飛仙羽。睥睨劍掛岑  
藋

峯。叱叱鞭投。鼃鼃舉。須臾呀呷。天霽顏華。葩馥。丑雲錦鮮。瑤瑤璿瑰。羅斑斑。炯吹朱  
燉。燔綠烟。淵客構館。耕鹽田。望中一髮長崎山。誕登彼。所貨具舉。邪許賴壓。倭奴肩。  
小德大禮。隋書小德大禮皆倭國官名伊支馬。陳書倭國其官有伊支馬次曰彌馬獲支又次曰奴往靺鞨等名跣趺露髻。爭駢觀。  
餘生那不。唄神力。刳羊燂豕。紛開筵。萬錢豈數何曾費。一擲甯容劉毅先。況有待女  
呈嬋娟。感金貼繡如意。倭寶珠名懸。燕舞掌上。驚鴻翩。傾箱肱索。纏頭捐。惟君熟視若無  
睹。木鷄不動。冰蠶寒。血濡縷。持利匕首。業緣割斷。夫何難。事了拂衣徑歸去。翔陽駭  
逸搏桑巔。

吳門客寓友人餉鮮荔枝

羅襦白玉出新粧。不數人間十八娘。四百紅欄今夜笛。月明吹滿荔枝香。荔枝香曲名

宿許天植見山樓

綠樹疎燈落燼遲。夢醒如中薄寒時。風通花氣全歸枕。月轉樓陰倒入池。如此夜深  
猶有笛。可因春盡竟無詩。開門便赴尋山約。酒熟茶香短簿祠。

送范容安之南粵

應臬司白公聘

嶠南人說好風光。粉蝶如錢撲帽箱。月上潮聲喧瑇瑁。雨晴野色潤桃榔。吟筵攔入



香山社歸橐知盈陸賈裝。安得抽颿同到岸。翠微深築讀書莊。

泊舟濟甯是夜無酒因懷太白舊遊

六十三泉天井派。山夾如城扼其隘。以資運道水滿盈。白龍受縛岸為械。可惜多濁泥。釀味非沆瀣。打門貰嘗之。夜盡併無酒出賣。嗚呼荷花旖旎柳娉婷。醉魄千年喚不醒。樓空此樂無人繼。賸有東山隔岸青。鑑湖試尋浣筆處。湖烟哀雁秋冥冥。

東阿弔陳思王墓

十年三徙卒歸陳。為是才多轉誤身。詩得父風為老將。賦因甄感彼何人。彼何人斯見本賦絹車廢簾推無驗。痼木危巢踏不振。陳琳柳賦幾蹈斃之不振汲汲魚山魂悵望。用本傳悵然絕望汲汲無歡語草痕西靡梵聲淪。漢東平思王在國思歸京師後死莫無鹽其塚有松柏皆西靡

過東平

蠶尾山光隱畫屏。星河磊落水空冥。風流誰繼蘇司業。歌絕歌聲小洞庭。

望岱

馬頭遙指岱峯巔。一氣青浮未了烟。不信其中還有路。却疑此上更無天。五更鷄喚東溟日。四面雲開太華蓮。玉簡金函消泐盡。登封人說漢唐年。

東嶽廟

冕旒搢珽座青宮。曾見虞巡二月東。神語虛空聞武帝。天書鄭重拜真宗。六朝檜栢龍形老。四壁雲雷蜃氣通。負海環封齊十二。五諸侯位冠中嵩。

望華不注

單椒何秀澤。俯揖如文人。桀起虎牙怒。刺天青入雲。變化一不測。昏曉陰陽分。濟水渺無際。四圍烟光熏。離群山作勢。縹緲雲中君。昔者鞍之戰。三周逐齊軍。土人記失實。謂之金輿云。

歷下亭

湖陰遺堞雨冥冥。玉珮歌殘不可聽。杜二來時已興廢。哀絲重問水香亭。

鵲山湖

鼉吼魚跳浪已乾。當年月送李膺還。如今鈴鐸鳴其上。脚底誰知是鵲山。

會仙峯范文正公讀書處

此峯合讓衆仙遊。公獨攜書上上頭。藥不啟封將馬鬣。壑曾畫凍忍民流。九盤壁峭雲扶屐。三伏林寒月浸樓。精舍至今高不落。接天蒼翠瀑垂湫。



羊太傅祠

重臣何法乃可死。舉賢自代而已矣。君不見銜刀破竹平江東。龍驤威名征南同。太蛇垂頭瓠繫頸。不畏岸虎畏水龍。兩賢推轂者誰是。角巾白士南城公。得所付授了乃事。及身奚必居成功。遺祠千載一瞻溯。屋宜門稱詞改戶。遺民峴首盡霑襟。東垣况探金鑲路。下馬椒漿酌斷碑。寒鷄飛上枯楊樹。

董子祠

荀卿爾何人。名亞我鄒孟。其流變韓高。暴虐助嬴政。坑儒議相斯。偶語棄市令。馬上治天下。鯁腐遭咥病。綿叢叔孫禮。粗知皇帝聖。齷齪鞬固申。一經焚視聽。平津實不學。謬執翹材柄。司空城旦書。黃老漸復橫。萬古思長夜。珠囊淪金鏡。廣川孕靈秀。醇儒以氣應。下帷懶窺園。三年心力勁。所讀者何書。秦火燒未竟。天人建三策。著錄史遷捫大愚。呂步舒。偃也乃為佞。歷相皆驕王。誠格學術正。長沙亦奇才。儒林有論定。遺祠今蕭瑟。碑斷草痕迸。下馬拜無人。鄰社加鼓競。牧羊牧豕兒。有禱神不吝。□生漢武朝。紛紛取侯印。

瀛州懷古五首

河間

宛在蓬萊島。憑高雲樹微。汗牛誰起冢。乘鯉不濡衣。尊福詩書設。毛氏注詩里與劉

鄉有書院摩榮鶴鶴飛。沈佺期登瀛州城樓詩四榮摩鶴鶴大廉陂百道。引水憶盧暉。

阜城

昌國君封邑。茫茫白草多。閉門新著論。劉書著新論於此持檝醉行歌。女漳已踰河去。衡猶

導海過。劉郎殊不惡。賸有讀書窩。城北牖為劉豫讀書處

任邱

何處公孫壘。千秋想像餘。莎塘魚浴月。桂室鹿銜書。石臼掃如淨。金沙流亦虛。子方

唐介今久沒。戍櫓遶官渠。

獻縣

日華宮畔草。到眼有餘青。河勢如鈎曲。鹽生亦印形。雁堂龍聽鼓。見沈佺期詩鶴寺馬馱

經高隱。劉淑王勣何人繼。花飄滿澤亭。

滄州

山谷掛此席。東坡送客歸。鏡光交水月。鬼語亂車旗。遡海鰐魚貴。逢年野穀稀。調平



鹽鐵論老少可無饑

萬柳堂

堂為元文正廉公別墅近益都馮相國招客暢咏處

盧齋

疎趙松雪

風流去已賒。野雲池柳有棲鴉。新荷驟雨瀟瀟夜。寂不聞歌解語花。

野雲元公

號解語花侍姬名

手執珠槃集霸才。火城如畫綺筵開。而今馬矢填車廐。誰記平泉草木來。

吳牧園太史寓齋紫藤花

暖風吹空雨初霽。古藤纍纍花照地。橫枝屈鐵戈戟張。密葉拿龍爪牙利。方其托根毫末時。飄飄已抱凌雲氣。便無高架得扳援。騰身直上將軍樹。花開七十二鴛鴦。織就天機宮錦麗。絲絲倒掛虹飲澗。水紋雲襯魚鱗細。又疑變相紫髯翁。冠珥幢珠事兒戲。不然天女散天花。雨墮曼陀燃法炬。蒲桃天上結芳鄰。旃檀林中參末契。如何香山老居士。武斷作詩相詬詈。

咏寓齋芍藥

香絲覆頰醉生潮。軟脚筵歌玉步搖。不覺夢尋花市夜。月明二十四虹橋。

題倪雲林墨蹟為沈叔園太史

米唯潔可師。范以緩得友。遐哉清閨閣。遺翰落人手。筋細競秋鷹。行斜媚春柳。乾連坤復斷。補綴辨跟肘。瘦沈亦迂士。寶茲勝瓊玖。世有換羊書。毋飲缸面酒。

題同年馮石泓明府課子圖時將之任古田

十年一相見。今夕是何夕。落葉風蕭蕭。頭白長安客。景星威鳳凰。駢羅滿君側。萬里獨南行。微茫山水國。公餘肅庭訓。學古代力穡。撞破此煙樓。湔洗紅塵色。吾亦蓄衆雛。失母事姑息。累碁作彪子。研田草其宅。懽忘王霸慙。嬾廢淵明責。將復何所遺。以安以清白。

送李碧岑上舍歸武定

文襄公孫

風雪咸云暮。飄然海上村。論詩曾幾日。述德況清門。姑蔑城笳咽。明湖廟樹昏。長安多落葉。誰識魏公孫。

晤宣城沈梅崖於姑蘇僧寺

破楚門東路。禪林此寄枝。書焚糜竺火。髻鑷鄭虔絲。一健天還與。三秋我所思。相逢今夕好。正及放梅時。

許氏園林東徐恕齋侍御



林鶯無語夜窓虛。一局碁殘月上初。客裡不知春大去。滿欄芍藥薦鱗魚。

慎承郡王山水卷子

為吳梅庵少司馬題

宣武坊南塵幕塵。退口眼纈生奇色。萬水千山一段雲。落我東井之素壁。紫瓊道人  
王別號風雅宗。給雲母輦珪封桐。為善最樂副腰腹。獻樂對策三雍宮。餘事磅礴戲游  
藝。荆關董巨皆下中。贈我此幅不盈丈。遼勢層層氣蒼莽。蓬萊左股太華蓮。一一縮  
取歸指掌。想其握筆如握龍。白雲隨之與來往。水聲淙淙松聲寒。夜半驚我未許眠。  
起向絹素一摩按。槎枒石角森戈鋌。就中屋宇相鉤連。得非樊川非輞川。誰其主之  
呼欲出。風雨颯至江吞天。吾家清遠富山水。廿年夢斷長安市。墨妙通靈信至理。恍  
然圖我屏風裏。只消添箇楸頭船。采采蘋香報君子。

謁鳳陽守無所遇而歸

雪大于掌風颼颼。漸車渡淮來浪遊。鍾乳滴乾夢蝶港。石牛僵卧乘龍洲。壺當花落

酌復酌。

用垂花鳥詩

錢以繩拖留不留。

用藍采和事

明朝掉頭尋短李。此亭定屬唐清流。

李紳刺郎

有短李亭

海珊詩鈔卷二終



海珊詩鈔卷第三

烏程 嚴遂成著

德壽宮四首

對窠轉攬袖橫斜。場打鴛鴦譜不差。曾記慈甯親製曲。牡丹花下舞楊花。  
腰上鶯黃去不還。金花顚顚落星灣。內家新勅絲鞋局。特結旗中二勝環。  
薔薇露孝宗御酒名。浥水晶卮。侍譙笙吹月上時。門啟候潮宣索鱸。厨娘剖得玉孩兒。  
節屆天申百戲呈。湖樓燈火夜通明。誰知雪洒荼油骨。白晝陰寒五國城。

伍相廟題壁

父讎一報臣應死。死後評量恨轉生。柱厲叔方成國士。申包胥不負交情。言之已驗。  
吳其治。疾未全除。越有兵。今日廟門車馬絕。滿江猶吼夜濤聲。

漁洋不義豫讓最為有識。包胥不作七日哭。殆不足交我卒存之。斯言不食真乃  
不負。皆翻論實正論也。

錢江待潮懷古

魚龍夜偃鐵幢斜。白鴈行營泊淺沙。回首南唐春夏水。瓦官閣下縮黃花。

富陽舟曉

曉色能移山。置之烟雨裏。重簾隔美人。朦朧倦梳洗。須臾雲塞帷。闐然裝俶詭。物忌太分明。以此悟妙理。若有若無間。目成而已矣。

桐廬道中

綠楊拂水鷺銜魚。一半人家枕竹居。涼雨滿身篷不閉。卧看山色過桐廬。

七里瀧

東臺西臺相對看。咿咿軋軋船上灘。水漪不生那容唾。山翠欲落如可餐。修鯉躍波雨點大。怪禽呼樹風聲寒。此間真箇無六月。篷背露坐星闌干。

釣臺

四七之際火德新。彗雲雷野靈貺甄。絳衣大冠變帝服。猶是性勤稼穡騎牛人。先生掉頭不肯住。眼中突兀見天子。天子安得與客俱。犯座星應占太史。君不見千秋亭。九成陌。赤伏符。今不赤。又不見南宮壁上圖功臣。功臣子孫行負薪。獨有釣臺一片石。東西對峙三千春。嗚呼建武苦兵銳。求治往來屑屑徵車至。旋登黃霸錄遺文。首舉伏湛典舊制。買菜求益懶復書。老矣何堪責吏事。鴻飛影滅大江東。釣竿不以換



三公礪俗磨鈍導先路。名賢蔚起部黨中。繼續逸民獨行傳。山高水長先生風。

睦州韓蘄王將臺四首

幫源洞俯大江湍。道是天兵度越難。一夕陰平懸鄧艾。萬牛即墨下田單。掃除不築降王郎。指顧曾登大將壇。父老猶能尋廢址。暮雲衰草不勝寒。

樓下山呼內變生。諸侯從合秀州城。先傳輔晉登壇檄。更率擒吳間道兵。鼠穴窮搜忘忌器。龍衣平慰認翻羹。凶門一鑿魚梁驛。靜聽甌閩草木聲。

情歸駭鼓擊金焦。沿岸遮攔寇遁宵。網已彌天難掉翅。船從平地忽通潮。有誰扣馬軍書獻。從此蟠龍王氣消。回首吳山峯第一。幕烏啼月樹蕭蕭。

醴泉投老悔應遲。口不言兵事可知。三字心傷張憲獄。兩河目斷曲端旗。斗量箭鏃身如畫。瓢掛驢鞍日有詩。休問東京舊時事。市樓淚落李和兒。

蘭溪

亂雲擁樹鬱蒼蒼。領袖金華此一方。城俯江流天作塹。屋依岡勢地朝陽。春浮賈舶芝蘭露。秋染漁村橘柚霜。夾岸翠微三百里。隨潮東捲下錢塘。

婺州二首

穀文金柘遠名州。於越西來路盡頭。城倚萬山為保障。兵衝三省是襟喉。朱旗縹緲雲車夜。靈火銷沉石馬秋。舟子烏知前代事。芙蓉凭弔漢龍邱。

八年姑蔑舊懸旂。欲問行營父老稀。衷甲不麾諸葛扇。飛衝常爇夏侯衣。淚收口婦門前拜。手縛降王馬上歸。大樹無言碑已沒。蘆花蕭颯釣魚磯。樓炮幾及面而墮。拾降一女。盜率七二萬兵以歸。請見弗許。羅拜門外泣而去。其餘功不及上者甚多。詳見年譜。

### 常山旅夜

江館雲陰合。青燈耿夜開。櫓聲離岸小。山氣壓城寒。樹老鴉棲穩。泉枯鹿飲乾。草坪離常山四十里。與玉山交界。明月路。細雨濕征鞍。

### 臨川尋玉茗堂遺址

出可以為吏。處可以為士。衣鉢奉茶陵。偏師禦何李。楊雄升老解事。聲援隔萬里。窮乃得古歡。四夢闡佛旨。書堂今無存。偏仄尋遺址。草淹牧猪場。石污鬪鵲矢。手種山茶花。校校犀甲峙。風舞小紅名。侍兒名。飛笛聲在寒水。

### 洗墨池

指揮玉如意。管葛大非偶。山桑既喪師。再舉屯泗口。右軍遺之書。開陳計長久。保淮



失勝算。畫江宜近守。虛名掩所長。筆陣落吾手。匣塵昭陵玉。缸飲伏梁酒。豈知善將略。文武器大受。朝廷失此人。懷祖位其右。臨川昔內史。墨池瀋寒瀏。黷墻倚殘碑。成陰栽新榦。空中如有聲。嘆息天台叟。

### 王荊公祠

位置館職宜。誤用枋政軸。可以大有為。乃流天下毒。執拗堅自信。經術傳穿鑿。叶傳法沙彌。護善神。狠豎狺狺吠小畜。垂簾女堯舜。蘇醒一路哭。陵遲逮紹聖。佞史祖實錄。刻石端禮門。圖形顯謨閣。叶國家大事所由去。非花石綱。非寶籙。敝置三司條例時。豫胎二帝蒙塵局。公相媼相爾何人。敢與荆舒鼎三足。遙遙七百載。亡社更幾屋。羊城儼遺祠。裔孫施丹艘。詔頒新義進字說。配食廟廷議當駁。君不見觀為老鶴雅老鷄。波水之皮竹馬蕉。

### 擬峴臺

蒼茫汝水來何遙。千峯萬峯相週遭。游龍怒馬各奔赴。一穴收盡城南坳。裴君相地具眼藏。于此結構臺凌霄。履舄當年半寄客。時與其屬來遊遨。羊叔子何預人事。三公不貴其名高。乞言文定附不朽。高臺橫檻今烟消。道旁亦無碑墮淚。渺然遺址深

蓬蒿白鷺銜魚點沙尾。蒼雲擁樹沉山椒。躊躇臨眺日淹暮。月華東出星寥寥。

謁徐孺子祠

荒祠遺貌儼喬松。塊獨名逃黨禁中。顛樹一繩規老友。負糧千里哭群公。洲邊秋淨鷺驚雨。門外夜涼葭莢風。此地舊傳高士榻。雲羅渺渺羨冥鴻。

登章江門城樓懷古

章江門枕大江流。船尾乘高瞰敵樓。楚赦解揚張子明終霸國。漢忘紀信麟不封侯。冲

濤戰鼓蟲沙散。沿岸漁罾秋。指點康郎祠畔樹。靈旗蕭颯暮雲愁。

滕王閣

灝灝江湖入望深。烟霄傑閣俯千尋。岼花迎權半吳楚。山雨入簾無古今。城影月移秋樹碧。笛聲風起暮潮陰。天涯別有青衫淚。不為琵琶濕滿襟。時聞臨川吳浣陵明府解官之信

渡鄱陽

烟與水無際。迷茫小洞庭。潮迴三楚白。山壓五湖青。葦折雁聲苦。風多魚氣腥。揚舠一極目。何處弔湘靈。

夢遊廬山歌



五嶽之外廬山高。亘二百里阻且遙。江游二載不一到。山靈憐我入夢相招邀。我從

之去掛酒瓢。雲車風馭駕兩尻。洞精矐眄路迷失。亦復歷歷辨晰明秋毫。我不知有

東西二林寺。大小漢陽紫霄與上霄。大小漢陽紫霄上霄皆峯名但見漱玉亭前三峽橋。又不知

寺樓何賢。寺樓賢何林有竹。竹林以火為蓮。火蓮院物有開必其先。開先寺但見玉峽珠簾

名泉三疊泉。泉下潭潭井黥黑。潭名峽旁堆疊石赭色。渴猿縋飲猊怒擲。千營萬壘環

滿溪。水初出山破山腋。一旅孤軍。摧鋒陷堅關隘圯。水本至柔至平物。遭遇坎坷受

偏仄。其性不馴勢所激。懸流掛空不着壁。亦不到地三層隔。中一小頓上差直。下闊

以長忽復窄。分注小澗達洎澤。飄若散絲紛曳帛。此泉之源出自香爐峯。正對五老

名峯名偃僂容。佛手。名岩抽笋尖。有七犬峯削葱。一一筆格排屏風。麻姑大鵬。名峯背上坐。吹落鐘

梵來何從。鐘梵聲風篁禽語如絲桐。不知身已埋雲中。萬竅怒號風震屋。屋搖搖

如舟逆大浪。浮虛空。山高壑大四面皆空故風力猛四望窳處坪。孟仰刀耕火耨勞春農。山中亦有平地用刀

耨耕火最高之頂。林林羅生叢。羅林庵以下視一氣青濛濛。城郭聚米江彎弓。風帆往

來如鳧如黑豆。鄱陽一口可以吸盡稱乾封。惜吾生也晚。不見明朝兩水戰。後擒宸

濤前破漢。倚金鏤床眼中箭。舟膠于淺風火亂。昆陽鉅鹿在平地。此乃天上脩羅大

公案。今則時平安所見。所見惟有古之人。文殊臺乃化身。蓮社遇慧永。與何無衲衣

半脛何率真。樂天草堂春最晚。秋花不厭陶公貧。有故里在白鹿吻吻引入洞。晦翁誦席

經紛綸。此外見何物。王成碑紀功。勒帛書大字。徑十尺。萬峯寺額。宋太宗書。神禹遺蹟。銘石

室。又有羅漢十八軸。元人達摩以來之畫冊。丁鵬可惜一二佛殿。賃戍卒。柱繫刀鞘。

戟庭植支竈。乃取北海一片石。李邕入夜竒觀。詫聖燈。大寐忽醒。東方白。急起筆之。

景毋失。畧記八九忘什百。其中迷徑。惑蹊。灌莽塞雲雨在其下。上不見星日。踏遍其

地動經月。一夢時半刻。安得一網收羅。歸枕席。差勝東晉以前人。廬山之名不曾識。

東晉以前無遊廬山者。自開蓮社始。善哉東坡言。他年入山非生客。

余兩遊江西。不一見廬山面目。歸舟夜讀稼堂先生記。以當卧遊記。近五千言。讀

未竟。睡去夢中依稀亦有所遊。仍是一邱一壑。於廬山無與也。雖然廬山固高且

大。自天地而觀之。直稊米耳。然則遊何必廬山。夢何必不廬山哉。約記之。旨用類

叙法

### 南朝宮詞十二首

缺齒多鬚品目中。白醪爬醬語偏工。當年改服張侯側。鱣鼻先宜召畫工。



三百年期給一廻。白門誤犯色如灰。大官擔付屠猪會。誰遣司風令史來。  
刺史名因被賅低。錢埋私藏殿東西。木槽中飯坑中水。此味何如蜜餞饑。  
西堂履跡事匆匆。鼓吹開帷視殯宮。此段蘇兄殊得力。不知緩死賴劉蒙。  
外舍家寒扇障塵。金釵千樹六宮春。生平不佩宜男草。何以為歡裸婦人。  
夢吞玉勝炒胡麻。雲氣陰陰羽蓋遮。自是常車迎不得。龍旗豹尾屬天家。  
鷄鳴埭應景陽鐘。白鷺東西鼓吹中。不廢六宮書學課。老年多識拜韓公。  
金華玉鏡雉頭裘。汲水來從阿父遊。空助厨人躬作膳。不將鴨鵝裹黃油。  
刀勅之徒鬼可憎。典籤漿藕大依憑。如何作事居人後。明帝嘗語東昏作  
事不可居人後覆轍涪陵

踏海陵

練樹團團受斧斨。梁臺餘體泣吳娘。吳淑媛獨憐張子今何在。挈首魂隨夢豫章。

紫光滿室器皆明。夢裡龍騰激水聲。露井金瓶陳百味。還需療妬膳倉庚。  
漂蕭陽馬醉而狂。洪吐衣襟帝入房。白角枕橫身透井。游魂奪婿到瑤光。

述古四首 存二首

眼額懸司憲。迷陽傷我行。羊鷺登決鍾。棗霍入香方。蕭數開火塚。虞翻取舊床。無為

作才語。不狂以為狂。

紙尾詎能署。眉頭安用伸。步兵實大較。祭酒可終身。握火已心死。懷永無角嗔。處于不競地。眼大如車輪。

### 鉛山縣石山

石者山之骨。土者山之肉。骨勝剛過中。無肉失亦俗。茲山不戴土。生是石使獨。童童濯濯然。李孫行父禿。嵌空洞玲瓏。睥目瞞其腹。如人不冠裳。不沐浴佩玉。穿穴據訓狐。托根拒嘉木。嘉木可以栽。訓狐可以逐。攘內飾於外。內外具各足。瘠而肥。濟之骨肉得和局。長揖謝山靈。斯言當采錄。

### 土木

水咽狼河草不春。前朝戰地浩無垠。青衣泫泫穹廬酒。紫蓋搖搖獵騎塵。餘恨罪惟誅馬順。先幾占己中全寅。裕陵奉祀談何易。賴有和戎社稷臣。

### 保安州訪沈忠愍祠

祠在州舊城面桑乾河公謫佃日有賈姓舍之里子弟皆就學

賈舍埋荒草。書聲不可留。白蓮迎相意。竄名白蓮教中論。碧血照河流。北海無完卵。東樓亦

斷頭。至今人廟祭。署帛哭春秋。

後州弟子在大學署以帛署公名入市看世蕃斷頭訖曰沈公瞑目矣慟哭而去



夜宿龍門縣

崎嶇不知遠。入夜林轉深。月黑虎斯怒。泉枯龍不吟。饑民瘦如鬼。長吏清有琴。滿屋朔風大。集枯翻凍禽。

老龍骨

老龍化為石。石勢感龍象。蜿蜒尾南垂。鬣鬣頭北嚮。中高艮其背。背俯時一仰。檀車簸兩輪。行如轆釜響。前奔栗馬股。倒退汗牛顙。脚底怕雲雷。破空發龍掌。呵吸桑乾河。農田藉滋長。何不以雨來。而乃以電往。功罪坐倒置。天公虛養養。東海王所宮。視遠青蕩蕩。

燕然山

連蜷龍門南。崑駁居庸北。中介燕然山。銘勒漢威德。武揚冠軍侯。功罪昭史冊。刺入屯衛中。賤奪沁水宅。毀服祈贖死。理兵事遠役。予曰有巡御。予曰有述職。雲輜旗絳天。天聲怒斯赫。犁庭老上遁。鸞鼓溫禺馘。戢海鷄鹿塞。橫徂彗星掣。口靈攄高文。隆竭字深刻。器歌滿致溢。末覺降其實。依倚震主勢。緹騎逮奴客。讎怨日以聞。合浦徙屬籍。仲山甫之鼎。鬼餒五斗食。蘭臺令史筆。失足殊可惜。博物迷世紛。目睫論過激。

鼓琴祭酒坐嘆動顏色。子雲校天祿。美新符命釋。賢者時不免。枉尋得尺直。諒哉山梁雉。慎始擇所適。

于役懷柔欲謁范忠貞墓不果

青松鬱成林。白鶴下翔聚。一峰旋紅螺。云是忠貞墓。昔公邁耿難。遺蛻委霜露。義士負玉歸。東園口葵具。親體認敝衣。血痕圜土污。義士許鼎負骨走京師驗其裏蛻殘幅猶繫中親體敝衣也入地牛有聲。握拳扣餘怒。我讀畫壁記。早歲生遐慕。今來訪墓門。王程限跬步。夜深玉蟾蜍。隱現亂烟樹。閩海萬里遙。魂遊定何處。

歸自宣府憇上關

前朝家裡地。荒遠暮山微。寺古僧儀肅。關嚴馬色饑。磬傳黃葉落。旂綽白雲飛。臺趾蹲龍虎。關南有龍虎臺秋從此際歸。

夜宿靈谷寺示貫澈上人

伽楞瓶下坐忘歸。靜對鑪烟夜氣微。鼠盜餘糧藏佛髻。月攜寒綠浸僧衣。煨來冷芋如拳大。畫上橫梅較竹肥。醒夢只消鐘一杵。隔溪磔起有禽飛。

鄴下懷古和虞黃胡芝廬明府



土山開道漏危機。法會香爐舊觀非。樹底蝦蟆乘水出。河邊羖羝上天飛。遺簪敝履宮苔冷。玉匣珠襦塚火微。轉眼童遊高末唱。晉陽四望黑雲圍。

魏孝靜

風塵無色履星昇。幡舉河陽霸業興。一夕移汾流斷絕。九層入海塔飛騰。戰殘故壘迷黃蟻。圍合空村閃白鷹。日蝕英雄知為我。重歌勅勒涕霑膺。

齊神武

借汪農部柳亭書檢還誌謝

南陔草堂十畝寬。家法依倣羅古歡。遊洛陽市入武庫。觀者目眩迷雲烟。而我貧無一長物。柳盂羽化厨亡桓。克食甚且質班史。移家僅未捨周官。一瓶借得遽如許。畫方以左右畫圓。飢人乃夢飯甑溢。不耕胡獲三百廛。物非我有豈終據。仰屋忽復磬倒懸。鄭賈還珠併棄櫝。魚未必得忘其筌。客來寒具手無污。樵蘇相對談枯禪。

題馮青岳月夜遊黃鶴樓圖

武昌佳哉鬱蔥蔥。層樓紺碧搖飛空。稽天倒浸如珪月。水妃捧出蟾蜍宮。寒聲慘澹散鴉雀。皓魄照耀驚魚龍。馮君扁舟來何從。乃在雲氣虛無中。南望蒼梧東赤壁。昔人羽化泠泠風。爛醉不死惟李白。上天下天鶴一隻。

雜錄八首

巨人昇大秤。秤量天下士。頭腦太冬烘。愧此一女子。  
祭服洗滌火。影如活卦映。姬環坐亦遷。潔癖非天性。  
焦先如冰蠶。露處雪中可。養內衛其外。胡不戒于火。  
長老不洗濯。衲衣育蚤蝨。如何屠膾人。膏氣喻頤額。  
持釣不施餌。安琴不上絃。漆園夢中吏。彭澤酒中仙。  
魚逆水以上。鳥向風而立。吾生行隨緣。馬牛不相及。  
鹿應聲以去。魚啼名以來。山鳥集其掌。玩物如嬰孩。  
潤州施玉撥。膏澤天然生。何如吳宮姬。無所用洛成。



海珊詩鈔卷第四

烏程 嚴遂成著

西行懷古二首

四面高中下。徑為井字形。雙尖如耳大。鹿耳一線漏天青。開道隨蛇迹。登城乞雨靈。

妙陽公主院。至竟百華馨。井

第五徑之口。飛龍勢攫拿。屏風山夜宜雪。玉照草冬始花。神女亦有壻。東海神書生

安用家。得道化望迷雲樹外。赤幟蔽山斜。鹿復

狄武襄祠

應募起田家。威名變夏怖。鉦止突而呼。裹創戰逾怒。收帳積聚燐。窺關風雨度。意造鐵連枷。膽落銅面具。龍衣不上聞。錄功懼疑誤。將略在讀書。韓范知之素。遺廟陰喬松。神鴉噪朝暮。下詔昔圖形。丹青等金鑄。字涅今不存。歿後樂誰傳。母乃失公心。遠祖謝依附。陋哉郭崇韜。泣拜汾陽墓。

文忠烈公祠

介山如龍眠。汾河帶其右。間世鍾異人。公獨得之厚。名聞大契丹。耆英繪者九。吾來

拜公祠。典型徵世守。相地開靈渠。溉田八萬畝。視茲萬世利。小節亮不苟。移判蜀錦獄。斷斷無何有。定策社稷臣。沒祀鄉祭酒。徘徊釣游地。越灌柱穴口。破甕一兒戲。兩宰天下手。比肩三四公。公最享上壽。祠門蒼髯松。儼立商山叟。九原如可作。願作牛馬走。

訪傅山人墓

太原人諱山字青主號公之地神于醫畫書皆絕藝隱居不仕

山人醫國手。見垣一方人。畫品居第二。草隸皆通神。積書一萬卷。其家故苦貧。鑿坏有時通。下簾甘沉淪。九重忽下詔。敦迫推蒲輪。棲泉呼勸羽。焚木登窮鱗。河汾衆弟子。不令圖麒麟。裔孫亦彫落。賴肩行負薪。荒塋二三尺。狐兔竄棘榛。棺中遂初眼。皂帽漉酒巾。晉書忌觸諱。傳不列遺民。高風一仰止。夙志聊以伸。日落下長坂。萬山青嶙峋。

介子推墓

一炬山皆赭。哀猿不可聞。小人還有母。公子在惟君。忌坂竄倉鼠。綿田棲白雲。蕭蕭寒食夜。風雨颯榆枌。

郭有道阡



槐龍踈地墓門荒。明哲千秋俎豆香。師法獨推黃叔度。碑銘無愧蔡中郎。避人詎必  
皆遼海。埋我何妨不首陽。依舊關心天下計。屋烏爰止慨興亡。

晉祠

祠戲祠空草亂生。山懸如甕下環城。龍收隔岸黃雲氣。水送前朝碧玉聲。一夜沉鼉  
鳴毀壘。千秋盤木記屯兵。摩挲薜壁留題遍。只數鴛湖二老名。  
碑刻疥壁頗多  
曹詩朱記獨絕

祭忠襄公祠

飛渡黃河勢已成。但憑一掌守孤城。三千兵帶飢寒色。百二關傳慟哭聲。報國不能  
生殺賊。殉君何用死留名。遺祠蕭颯橫汾曲。夜夜泉飛白鶴鳴。  
公葬時山泉忽  
飛出白鶴繞墓

北齊宮詞十首

席布金錢壁寶裝。等閑握槩又何妨。瓠蘆中月鴉鳴帳。贏得人稱太上皇。  
雌霓連蜺化兩雄。  
二少男雄鷄喚起白鳬翁。絹囊淋瀝為尼去。記否橫刀昭信宮。  
赤池金帶沒深苔。手抉哀號擊不開。人亦如余知愛子。濟南去後樂陵來。  
晝下清霜夜彗星。三臺置酒樂聲停。白袍未御山神見。漆鼓丁東帶小鈴。  
瑞璽文生鄴水涯。喚他刺髮送還家。酒清酌滿黃花落。空負珠裙七寶車。

賜名續命換隆基。隆基堂名禮翟馳來命着之一自琵琶絃斷絕布裙老嫗配春時。

鏡殿盆燃火萬枝青廬牢饌濫恩施匆匆鞍後金囊在可似窮村乞食兒。

假髻西斜剪剔勞無端盡勢也名刀持瓢搖樹人如海索蠋餘功索蜩膏。

守龜茲國獵三堆何用愁為樂一回已見林宗從冢出更聞明月遣兵來。

刻木誰為死魃形聖人石上跡曾經禿師莫叫阿那瓊且與歸休解卸廳。

紀掩答欵塞事懷明王襄毅公二首

余分修山西通志見掩答屢入寇前後死二百餘萬人自襄毅受欵迄明季不變然

始多異議而主于中善其後者功俱不可沒也

城郭豐州帝制雄鉤聯三鎮潰雲中唇吹石勒漚藤嶺血浴高歡避暑宮奇貨歸來

和始定名經請去貢長通相臣

新鄭江陵

主議民休息宋事虛徵葉夢熊

不信漁陽突騎粗連年膽落鐵浮圖奇功忽逸桃松寨小勝惟誇苡麥湖海若何心

邀祭典關氏有手握兵符西方以次皆歸欵衣賜紅獅老把都

事詳韃靼傳

砥柱峰

河從受降城北折徑南注萬山東縛之龍性馴不怒及茲下三門噴薄流懸布砥柱

屹當衝四旁絕依附何所恃而傲力與河伯忤推剛終成柔條分左右去捲土趨向



東昏墊連徐豫。神禹無治法。計窮顧天助。鏟除崑崙山。絕河之來路。西海為尾閭。是龍安身處。

天門關

一髮崢嶸路。摩天虎勢蹲。豁岨排雁齒。紆磴蹙魚鱗。莽伏探丸地。鷄鳴戴橐人。此盜以窟穴得手隨遁春秋嚴重閉。甌脫是西隣。

赤洪嶺

爾朱曾敗績。元海此稱兵。草沒方山堡。風寒左國城。黃河魚大上。白晝虎橫行。戰地稀人迹。深叢鬼火明。

曲峪鎮遠眺

時西陲方用兵

地近邊秋殺氣生。朔風獵獵馬悲鳴。鵬盤大漠寒無影。冰裂長河夜有聲。白草哀如征髮短。黃沙積與陣雲平。洗兵一雨紅燈濕。羊角魴魚候火明。前明邊墩掛紅燈其上魴魚皮為之勝其濕不壞

三垂岡

英雄立馬起沙陀。奈此朱梁跋扈何。隻手難扶唐社稷。連城且擁晉山河。風雲帳下

奇兒在鼓角燈前老淚多。蕭瑟三垂岡畔路。至今人唱百年歌。

分水嶺

形如人字一脊中分山南據脊利歸山南山北據脊利歸山北遼爭黃崑山三十餘里意在得嶺而自上臨下也見宋割分水嶺界議

人字山形扼兩頭中分於此畫鴻溝。增金已誤尋盟議。

澧州之役

啟戶真成揖盜謀。始信

啼鵲皆北徙。

割地之議荆公主之故并及福建子

能禁牧馬不南遊。黃崑坡下無多路。直抵燕雲十六

州。

### 長平坑

四十萬人無一活。誰實坑之曰趙括。於武安君乎何尤。乃云食報在杜郵。設也其父馬服君行師。雖有百起胡能為。讀父書者古來少。其母知之君不知。坐令千載長平下。孤人之子妻則寡。天陰雨濕聲啾啾。白骨如麻埋曠野。嗚呼新安二十萬降人從。此勿怨西楚。怨西秦。

### 劉王溝

龍門髻鱗變日精。左手文以名其名。提挈五部推亂晉。蚩尤熒惑躔幽并。十年任子孤羈宦。款飲縱酒傷譏間。摧虺宜早斷先機。養虎羣知遺後患。一朝雲雨騰蛟龍。栖冰銜膽老英雄。居然帝業紹炎漢。玉璽躍出汾河中。前都離石後蒲子。荒溝廟貌留



遺址獵火當年照地來。旌旗影繞雲霞紫。再傳東市血斑斕。墓掘宮燒指顧間。永光陵名游魂棲泊處。蒙珠離國不周山。

寧武關弔周忠武

函谷泥丸封不固。黃河處處防飛渡。擺邊殘辛苦無多。連城已破蒲汾路。晉陽退保甯武關。礮車四面高於山。彼衆番進我援絕。巷戰手中無寸鐵。跳躄騰空三文高。老拳巨額相分裂。抵死罵猶不絕口。全家婢子登埤守。潰圍力竭劉遐妻。斜築尸填朱序母。烽火長驅達帝京。降書揖賊爭前迎。甯武既破賊亦大創思退大同宣府兩鎮總兵官相繼迎降賊遂長驅而東關頭夜黑英雄鬼。風雨靈旂捲哭聲。

太行

崑崙西極忽東遊。華蓋隆然一脈收。太行支脈來自崑崙形如華蓋爵讓公侯頒五岳。靈輿雲雨潤

三州。尚留丹竈媧皇石。曾繫黃龍大禹舟。南北兩條分半脊。直將天地劃鴻溝。

兒孫羅列百靈朝。小白懸車道路遙。掉尾為龍翻碣石。太行連延東北接碣石入海連群如馬勒

中條。孕生碧獸跪而乳。有獸狀如鹿羊名曰駝壓住黃河瘠不驕。呵吸仰疑通帝座。凌雲我欲

上山椒

紫荆關

燕趙南通路。雄關扼要樞。前心遮倒馬。右臂展飛狐。棘刺鈎衣利。霜枝殺草枯。歐陽

遺策在。

文忠公有疏言紫荆形勢甚危

保障指浮圖。

關一名石浮圖

汾郡春日

一桁亭樓影。瓊簫出翠扉。花深鷺入定。沙軟燕忘歸。宿雨隨旗捲。晴雲擁馬飛。吹來香不斷。蝶粉污春衣。

題崔拙園太守詩集

名應階江夏人少隨廣東總戎任善騎射同知直隸西路以捕劇盜報最擢汾州府時西事甫平

少遊南上紅毛城。鯨波熨貼樓船行。黃來笏竹番蒜果。入手磊落堆甲兵。北轅一官主殺賊。山東西搜丸赤白。弓聲霹靂箭餓鴟。月黑射虎如射石。帽檐歌側帶有餘。乃公雅復治詩書。賦出入塞氣慷慨。飄飄欲封狼居胥。有時變調宮商換。紅豆相思情繾綣。柳條攀處馬蹄遙。花片飛時鶯語勸。沅有芷兮澧有蘭。楚人自昔多哀怨。秋風飛雁落汾河。我奏吳歎和楚歌。和歌方酣拔劍舞。凱旋報道羌戎和。馬蒲桃。草苜蓿。龜茲樂。于闐玉。邛竹筍。醬通身毒。底定屬國三十六。為拓岐陽石鼓碑。戴賡元狩蕭

鏡曲



題耕岩草堂圖為沈樞崖山人

河邊石人眼一隻。翟泉鷺二蒼白色。剗餉練餉名無實。六隅四正空秦賊。墨線據坐中樞堂。三疏抗論直臣直。帝閭沉沉日月黑。鼎湖大去廟祔空。一馬渡江魚非龍。春燈蟋蟀獅子賺。持此籌國何從容。漢起黃巾赦鉤黨。小朝廷反張羅網。網盡東林復社人。報復私讐忘板蕩。但見倉鷹擊殿飛。誰防鐵騎橫江上。耕岩名在刊章中。弋者何篡冥冥鴻。破家無事容張儉。亡命幡然竄蔡邕。金華山深瑤草秀。有流可枕石可漱。亂定草堂歸去來。白髮如新面已皤。彭澤松菊認宋遺。武陵衣冠襲秦德。文孫墨妙繪作圖。展卷一片烟糊模。君不見洛陽銅駝卧荆棘。玉津金谷青蕪國。此堂獨作魯靈光。不受昆明劫灰蝕。他年宛水去揚舫。門巷依稀夢飽經。其旁定種冬青樹。其下應修野史亭。

懷人詩六首

吳浣陵

白髮梨園幾個存。花殘月謝忍重論。珊瑚樹大徒豪舉。薏苡車多是禍根。城上鷓鴣歸應失路。樓中燕老尚銜恩。瀟瀟寒食西冷雨。誰對棠梨哭墓門。

韓文怡園

尊甫蘧廬先生有明詩兼選文續成之故于前明遺事甚詳一生酷愛登場觀劇因之墮水與令弟碧成友善唯談詩不合往往酒間忿爭琴瑟靜好大詠茉莉詩碧玉枕橫涼氣味水晶簾卷夜精神蓋有為也

鍊得童顏似曉霞。目光爛爛輔颯車。佃漁一代歸譚柄。歌舞千場入夢華。仲智火攻聊借酒。王濛水厄不關茶。老來慰冷情依舊。玉枕晶簾未麗花。

馮丈十畝

著有毛詩陶詩解別墅在長起山麓號留此庄

一生潔癖米南宮。元箸超超解最工。景豫祕應徵食疏。鄴侯輕欲立熏籠。長川樹遠雲帷卷。小塢花深鳥路通。留此空名今易主。滿離蜻蛚弔秋風。

李寧周

客蜀數年前得合州判病卒無子遺一妾不嫁與大婦歸守父成遠左不知所終

遨頭未看客星淪。萬里魂迷去住因。斜日青楓艤峽暮。落花紅雨杜鵑春。緯相與卹有嫠婦。祭則告哀無寡人。入地料難尋戍骨。遼東不是蜀西鄰。

家卧山伯

善山水禁斷筆酒終身不娶客遊以老

一生供養錄雲烟。八難三塗累早捐。禁酒却齋蘇晉佛。神絃不降智瓊仙。與山偕隱何須買。此樹多陰大可眠。死後青蠅莫相弔。長容我我作周旋。

謝散木

余在山西聞其必問



雁聲吹墮朔雲堆。髯也無年首重回。昨歲似聞中散病。青山不待巨卿來。破除生業書偏富。慰藉神遊子尚才。地下若逢姚合逸問。黃蒿如柱粉成灰。

煙花債傳奇為拙圃太守題

宋單飛英字騰實小字符郎與邢氏女名春娘同居汴梁孝感坊本屬中表蚤歲定情值宣和亂春娘被虜轉入全州娼家更姓楊適符郎司戶來州目成心許探得實以言挑之無祭他昨意遂禮成夫婦焉宛邱崔拙圃太守客東京時為作煙花債雜劇余有感於中因題其後

單符郎。邢春娘。同住東京孝感坊。美人脂蓋調鸚鵡。公子華衫鬪鳳凰。兩家本是內兄弟。玉鏡一枚盟早締。草短靡蕪金埒開。花深豈翫珠房閑。捲地烽烟入汴梁。大河南北作戰場。礮具移來艮嶽石。宮車載出牟駝岡。狐狸豎毛虎擇肉。玉葉金枝泣路旁。掌上雙擒生翡翠。池邊半折睡鴛鴦。春娘流落秋娘妬。鏤月裁雲等閑度。眉挑綵筆畫啼粧。背剔銀燈結窮袴。符郎天遣到全州。司戶曹間夜暗遊。問柳依依馱細馬。采蘋宛宛蕩扁舟。誰知目送楊家女。望夫山前風雨語。寶鏡重歸徐德言。繡襦卒配程鵬舉。風流此段合傳奇。宛邱太守有情癡。蘸將紅粉飄零淚。彈出烏絲絕妙辭。十

年我已念華屋。一曲淒涼忍卒讀。任其所之絮盡飛。未能遣此膠難續。琵琶按譜不成聲。空灘孤鴈蘆梢宿。余悼亡後一妾死一妾去

### 題怨綺錄和商寶意太史

姑蘇張氏女居采蓮巷。年十三色明艷。綺川將生鬻之。歸名秋霞。憚其婦未發久之。託疾命侍茶。得暱。尋有饒舌者伺而獲。竟別屬。生遂與婦訣。越二十六年。向人言撫別時香囊。所盛髮猶歛。歔泣下山。陰諸名士錄其事。曰怨綺相和。答余為補。討妬婦檄。而讒人罔極。亦可以思反矣。

采蓮巷口人如玉。照耀紅欄三百六。芳信初將豈菟含。幽情未許鴛鴦宿。婀娜腰圍楊柳斜。袖尖微露牡丹芽。侯家浪設生絲帳。帝里輕推雜寶車。畫船載上澄江水。小字秋霞新喚起。無可迴頭憶餅師。且教捧手充燈婢。病榻呻吟怨寂寥。黃緣茗具可憐宵。據經曾說鶻鶻膳。放甕偏騰鸚鵡譟。隄防不料桃花斧。手捉迷藏力孔武。鄉人溫柔睡正圓。咆哮躍出胭脂虎。鐵騎衝闌玉樹歌。羽衣打破漁陽鼓。隔河消息逗誰家。別去紅牆萬里遐。雙鞦應佩許虞侯。靈藥難求古押衙。二十六年他昨祭。靈犀兩地遙相寄。依稀舊物認香囊。宛轉遺言剪了髻。吁嗟乎。世間薄命鍾美人。處處風波



妬婦津。喧呼不怕逢狂鬼。綽約生憎誦洛神。甯知四海皆臣妾。銷金衆口空。口。囁毒。醪。定要賜金瓶。休勅姑容賣皂英。

晉問四首

回紇見大人。契丹呼異人。兩人為晉有。璧馬何足珍。  
龍門家有史。涑水國有史。彼哉忠孝經。中有文中子。  
灌城挾晉水。水枯空有祠。如何山頂上。雁乃為之池。  
中流橫樓船。雁飛簫鼓咽。一夕賀六渾。移之使斷絕。

故晉王宮

晉陽城北隅。藩封遺故宮。繚垣如玦斷。塵網雙扉紅。階祀草深沒。瀟碧池魚窮。桂熏履綦跡。隨風飄何從。巋然甲仗庫。藏器光熊熊。火藥十三缸尚在石卵銜狼牙。弩名昔以乘其

墉。臨淮為唐守。穴地用火攻。忠襄効前法。賊營逃虛空。副車椎博浪。天意人無功。襄

洛繼淪陷。踰太行而東。井陘避重閉。北折趨居庸。中央一孤注。環攻圍數重。鉦鼓屋

瓦震。血流汾河中。鹽尸舂磨寨。不知王所終。史不言王死處荒壟枕林麓。陵距城北三四里獸材披

蒙茸。虺刺狸獐門。束枯擔樵童。日落四山黑。鬼妾宵潛踪。金牀可哀曲。鳴咽幽蘭叢。

海珊詩鈔卷四終



海珊詩鈔卷第五

烏程 嚴遂成著

涿州張桓侯廟

里指樓桑樹影重。廟檐黑壓陣雲濃。魂歸欲裂譙周表。運去難追召虎蹤。

初封西鄉侯。策曰：俾

召虎蹤。

醉撻健兒胡不誠。婚辭貉子與俱凶。軋

綽

吞吳未遂無多恨。恨逐驃車受晉封。

次子紹為侍中。從後主入晉。封列侯。

金質甫曰：識大義者唯趙順平侯。固見不及此也。結意補圓。

安肅道中

水粼粼。渌菜畦香。塢影如龍卧。夕陽高柳亂。蟬風不住。殘聲曳過浣衣塘。

浣衣塘。孟姜女浣衣處。

滿城道中

一雨遙山抹嫩涼。車驅不覺大隄長。風隨柳轉聲皆綠。麥受塵欺色易黃。士以金來輕郭隗。民因法死怨張蒼。兩家爵里相鄰近。極目頽垣蔓草荒。

唐縣

墮樵滿地紡機橫。兒女唐裝太古情。白骨未收銅馬賊。青山猶繞樂羊城。平沙入暮

多牛跡。疎柳迎涼帶水聲。欲問葛仙修煉處。天風臺畔月初明。

### 重過正定東解蘭田明府

十二年前夢。荷花開滿汀。重遊怨遙夜。煙雨秋冥冥。草綠龍騰苑。風寒麥飯亭。美人

渺何許。鼓瑟聞湘靈。

蘭田隸楚籍

### 龍泉關

燕晉分疆處。雄關控上游。地寒峯障日。天近鶚橫秋。虎護千年樹。人披六月裘。夜來風不止。嚴鼓出譙樓。

### 虎跑泉

斯泉昔無名。瓶置自中貴。有亭何翼然。隱隱露螺髻。旁出澗崢嶸。樹杪與之際。混沌眼不分。水氣雲雷氣。佛身浸純綠。四圍助蒼蔚。紺碧半以頽。弘願待茨旣。催歸鐘杵停。隔崦聞虎嘯。

### 阜平縣齋題壁

地形陂不平。聲確莽零亂。熊館人三休。羊腸路百轉。支河四五道。一河滙湍悍。力能捲土去。而不資澆灌。居晉之下流。東南蔽畿甸。鹿角特三關。犬牙制九縣。僊答昔人



冠閫賊游魂散間道實阻隘狼藉經四戰載筆闕誌乘攷古發遙歎

五日到一羊十日到一豕日出數丈高寥寥黃帝市官無食肉相清芬襲牙齒雨肥  
菜甲滋霜老瓜團委佐著良已奢調饑念田里橡實以為饌桑椹以為醴監河活枯  
魚安用西江水

### 長城嶺

太行從西來一折亘南朔龍脊長蜿蜒天塹劃地軸三關尾龍泉

在紫荆關下

壓五臺

山麓晉所據者高勝勢竪建屋東瞰幽燕東萬象皆俯伏有城跨兩戒左右歸掌握  
敵樓高崔嵬雲中大旗卓西向莽周原退即墮坑谷直下二十里里里八九曲中休

喘小憩僧寺暄丹腹幽森老樹精甲鎬霜皮綠

有大樹相傳楊延釗掛甲於此

近關岢然窪磊砢石

聚族雙壁削劍刃一門闔筍角中通洞逼仄人入蛇之腹萬古本無路巨靈以蹠撮

道狠闢轉嚴鎖鑰攻守局乘輿昔巡幸曾費斧斤斲盤蹙蒼納級纍纍就崩駁雉堞

乾隆五年議修長城并阜平舊城等工

興築良獨難源泉湧萬斛滙以衆山力輓

雷震影鬣頃刻亂縱橫虎蹲羊抵觸安得役五丁神通變平陸車亦不必懸馬亦不

必束天險今可忘行歌聽樵牧

北湯泉

水挾火為體。火借水為用。陰陽互其宅。搏攬造物弄。尋源犯嚴冬。重掩樹葉凍。碕屋石屢屨。黑雲彌罅縫。默然聞丁訕。疑陷蛟龍洞。鼻觀熏丹砂。姪女嬰兒動。躁怒戒金石。伐性斧斤痛。泉以柔道行。外鑠息內閤。宿疾如詭隨。沸湍一網縱。清風生左腋。鶴跨仙人鞵。何當蘸楊枝。置符提汲甕。天漿迸地流。沐浴與民共。勿藥者良醫。私據吾深恐。

南湯泉

北泉冬氤氲。南泉夏泮渙。涼堂敞四周。砥平白日燦。養魚灌菜圃。

水煖能養魚澆清泚。稻菜北泉亦然。

毛髮鑑其旁。別一區。婦女登彼岸。亦復滌羅巾。軒軒日魚貫。采蘭戲溱洧。流風逮唐漢。賜浴華清池。窺浴昭陽殿。人非長乳星。可令侍中見。茲邦氣淳樸。習苦輟游宴。澡身去其疾。藉以勿藥汗。吾聞女有誠。守坊毋越畔。宋宮不姆隨。楚臺不符喚。甯死於水火。一溺一焦爛。矧乃采薪憂。方寸何足亂。陰陽割左右。位置合璧判。魚龍終雜沓。觀聽意未善。紐結玉鏘鳴。內飾固嚴憚。踰閤輜軒垂。適野帷裳扞。此禮非僻書。煌煌列女傳。使者司采風。舊染富草變。量移時未暇。筆之古僧院。

時余已調阜城。



答錢學使香樹先生

阜城無城無公  
解寄居于廟

黃葉落滿地。殘書嬾復親。虎狼寒弔月。鵲矢暗封塵。與佛三生友。無城九縣隣。恒河

莫相照。老矣不如人。

沙河經流縣  
中一名恒河

使節一以至。鏘洋動古懽。集傳憑庾信。

時以詩  
序見委

見晚惜嚴安。舊雨吳江冷。

丁巳姑蘇  
舟次一晤

西風易水寒。我思曷云慰。空谷採幽蘭。

### 宿易家山庄

老樹紛壓屋。漏天星小明。壞籬容鹿入。側砌讓泉行。鳥不作常語。山能無俗情。此間  
覺秋早。颯颯林風生。

### 重遊城南諸山

南山昔忽翠。嬌修畫眉嫵。雲氣相縈迴。山亦作龍舞。重遊歎黃落。山遇風而盪。如人  
去冠裳。兀然獻頭股。任質固自佳。已甚毋乃魯。春風來何時。懷新百花吐。

懷同年吳涵清明府

名方平

山環白鹿臺。月上龍吟閣。瑤琴一罷彈。夜寒傳魯柝。西湖數舊遊。一去如黃鶴。存者  
不相聞。死者不可作。我來華陽亭。百里天仍各。孤鳥沒長河。荒雲帶叢薄。佛燈青熒

焚空亭一葉落。

索蘭田畫

解君作畫通畫理。不畫山與水。不畫人與鬼。畫花花有香。襲人衣袂蜂飛揚。畫鳥鳥有聲。隨風吹碎花枝晴。花既畫香不畫骨。鳥亦畫聲不畫色。意在似與不似間。飄飄直欲無筆墨。筆墨之外別有得。求畫于虛不于實。搖之可活呼使出。能事千秋幾人識。君也奄有崔徐黃。後輩那數藍錢塘。乞歸一幅掛寺壁。空山雪夜生輝光。莫浪語。勿漫與。此畫通靈欲亡去。

後梅花四首

東風取次近離魂。粧點江南水一村。自入山來皆雪意。最無人處有烟痕。攜琴未許鶴為子。拄杖忽聞僧在門。歸路冷香收滿袖。月斜牆角正黃昏。

縞衣仙子玉華宮。曲牖疎簾面面通。却立偏於人影外。餘情多付水聲中。即空是色休疑月。在遠能香不畏風。忍著嫩寒看未厭。一天微雨又濛濛。

獨抱冬心凍不枯。欹斜未許綠陰扶。忽飛雙鳥對相語。微礙一雲疑欲無。若入詩評為島瘦。即論畫格亦倪迂。老來禁斷揚州夢。夢去孤山雪滿湖。



酸醎外味隔塵緣。管領將昏未曉天。殘笛一聲涼在水。遠峯數點碧於烟。驢鞍斜掛橋邊路。鶴氅橫披竹外船。知有人家住深處。落英流出第三泉。

書縣齋壁四首 今存二首

窺書洗得癩兒名。描畫無妨戴帽錫。漸老年光憎絲髮。此間絕味愛羊羹。故應有說成寬隱。亦復何心校重輕。劇碎匆匆良我分。為持面目謝宣明。  
帽落衣垂老見侵。底須潤古又彫今。為郎自合難庸峭。公子何妨借陸沉。月下偶人無後辨。堂邊修竹有貞心。不勝官亦尋常事。留此良琛在藝林。

晉宮詞八首

暴雨收書一婢知。粥流衣落氣如絲。可憎老物何煩出。忘却春華執爨時。  
布帛陳陳各百錢。犢車雨濕露車乾。如何空室尸經壞。不造靈牀通替棺。  
絳紗一繫泣玫瑰。竹葉遮門望幸來。灑地紅鹽羊舐汁。多因將種一徘徊。  
卞蕭衛確無緣入掖庭。瓊芝性妬語偏靈。婚姻禁斷成何用。長白收來又短青。

賈納短青  
傳序語

長白

永年築室鏡鸞分。攘袂專爭佐命勳。戟及幾枝胎墮地。黎民莫怨廣城君。

洛南小吏入巾箱。天上嵯峨白玉堂。傳得窺賓青瑣訣。殷勤西域遺<sub>去聲</sub>奇香。

宮中懸<sub>去聲</sub>簷漏聲斜。備禮親輸杜姥家。織女齒生曾幾夜。三吳素奈遍<sub>去聲</sub>簪花。

織坊門掩夜黃昏。不及諸姬沐帝恩。日月入懷龍枕膝。相經偏叶黑崑崙。

### 古風呈江太守二首

天下無冤民。我聞張釋之。益重經術吏。得之雋不疑。太守未出山。六籍勤數留。折角樹妙義。解頤鈎深思。醞釀入治譜。安用法律為。公羊穀梁傳。據以斷獄辭。求其生而得。樂至不可支。祀典祧咎繇。敬告良有司。

謂我父母者。我當以為子。天子命我來。道在安之耳。魚相忘江湖。奚忍擾獄市。與為猛於火。甯為懦於水。用刑如用兵。出於不得已。罔謂天聽高。去天尺有咫。

### 上魯觀察亮儕先生

公年十五六七時。擘窠能書磨崖碑。出語往往壓長老。萬斛湧地瓊琚辭。阿翁滇南開幕府。公復有力闕虓虎。親臨戰陣矢着面。不動如山手提鼓。下馬容與翰墨場。忍饑誦經聲瑯瑯。忽然倚天一長嘯。鬼雄騰逃鰲罷釣。毀祠常斥梓潼神。

觀察以神乃張惡子凡所

到必毀其祠

投巫不數西門豹。晚登一第官洛陽。飲水如蘖排風霜。將濟謂能來阮籍。汲



點本自輕張湯

二語集錄

白簡封彈強項吏。帝曰卿材兼數器。梗楠厄震棟梁成。鷹隼培

風牙爪利。至今清夢繞紅雲。說着先皇便流涕。高牙遷轉燕南城。書三十乘隨身行。

醞釀老夫經國具。佐禹治水兼治兵。

時制府已兼筦河務

滄沱魚龍受戒律。上谷草木知威聲。

政餘好事等年少。晝靜登登亭墨妙。乃爾嫵媚一詩成。露咽三危杳九竅。文通武達

能何多。顏如渥丹腹則皤。試看據鞍詫馬援。誰能遺矢譏廉頗。時平投却封侯筆。陣

圖閑曬晴窗日。

### 蓮花池和顧香霞明府

我來蓮花池。已過蓮花時。

二句即顧語

蓮花不見見蓮葉。采之采之不用機。屬玉一雙飛

向人。垂楊垂柳無復春。弦歌間與蓮歌發。亭臺又是一番新。憶昔金源末。元取燕雲

割。守帥張柔此駐師。借得一池作納鉢。

納鉢華言宿頓所也

撞鐘伐鼓氣豪麓。鑿之深

深役萬夫。開平犁庭捨僧寺。至今香飯供伊蒲。嗚呼武人好名雅好事。市閭凌霄展

金翅。悲加願羽暮生愁。何處東風橫翠樓。

東城外橫翠樓城中大悲閣皆張柔建今閣在而樓亡矣市閭悲願羽見劉靜修

詩

### 道蓬李座主穆堂先生使車二首

眼光那復在三台。肯向孫劉長揖來。十載閑身隨史局。九重清夜嘆奇才。文饒曾下

孤寒淚。元禮從呼部黨魁。今日郵亭逢使節。江南江北報花開。

師于庚子有孫策渡江陸機入洛之目

氣如雲。小異當初識此君。轉眼漸防顏駟老。到頭終

讓趙衰文。憑渠檻外千帆過。乞與山中一席分。腰鼓弟兄今隔面。華陽亭月照離羣。

阜城有華陽亭相傳嵇康彈琴處

### 玉芝山院示諸子

試聽沙河逝水聲。流光易老最無情。培風小鷁乘秋下。仰雨平田趁曉耕。衣上上墨

痕如畫格。夢迴書味在茶鐘。此中可有消閑法。花落明朝草又生。

是歲交河旱分司灾務

贈馮漢儒少尹。哀鴻相相澤中聞。半載塵勞與子分。謝朗自佳何預事。

君叔與余同年

陸機從小最能文。河

光夜定呈明月。山意秋闌愛冷雲。青史他年徵治譜。小馮君接大馮君。

尊甫官高密令

### 憶亡室示大兒名裘

我讀書。卿刺繡。一燈坐對黃昏後。卿憂我不早成名。我則憂卿病消瘦。一免以悖死。一免以痘殤。慰情弱女方扶床。過年苦索新衣裳。新衣裳。舊年換米充饑腸。腸饑饑



可耐頭上釵鈿問安在也。入城中富貴家。算利如今賈三倍。怱怱廿載嫁黔婁。薄命誰知不到頭。生存已無華屋分。零落况復歸山邱。臨終遺一語。語我琴弦勿重舉。怕使他人打兒女。是時阿三歲甫周。和淚呼娘呼不休。阿二是時三歲半。小小麻衣朝暮奠。有爺長出門。姊妹相與視眠膳。竚竚念此兩孤雛。一生不識娘顏面。大兒今年年十九。可能回首思娘否。知汝娘魂隨我來。夢中長見舊粧臺。殯宮隔斷三十里。暮雨瀟瀟沒草萊。

崔德超學博餉魚

吾家於水鄉。性酷嗜水族。鄙哉大蘭王。取作秦客逐。次第品衆珍。魚為君子獨。西塞桃花肥。東江蓴菜熟。鳴榔刺船來。供奉將軍腹。北遊饜官厨。食譜近凡俗。退休磬復縣。塵甑飯脫粟。按圖攷鵠蹲。櫻夢憚羊蹴。今晨指忽動。遺來鱗六六。濛濛烟雨痕。虛室生寒淅。入腸搜葩分。顛趾棄垢宿。臭味逢故人。清風濯梅竹。雅意當報君。林田種苜宿。

夜聞沈樊桐內翰過泊頭將由江南之江西

聞道征帆過泊頭。離亭搖落遠含愁。壁蟲秋靜作人語。露葉夜明如水流。潮信茫茫

五馬渡。雨聲淅淅。百花洲。憑君尋我題名處。廿載西風感舊遊。

東同年金高亭明府

時甲子正月杪高亭解鹽山任將歸予交河事政循例入京

收燈一笛落殘梅。此曲人間也可哀。春水方生公欲去。桃花淨盡我重來。宜男誰獻倉庚膳。避債須登駿馬臺。大半閑情同漫與。青鸞飛下小蓬萊。

高亭無子多妾亦日事扶鸞

有感題泊頭壁

離人夜上潞河船。燕燕差池小雨天。春盡綠楊風落絮。淒迷七十二沽烟。

無題

泛泛征帆下析津。瀟瀟暮雨暗傷神。朝雲不佞東坡佛。樊子空歸白傅春。山下蘼蕪成故我。臺邊楊柳屬何人。夢回猶似聞吹笛。無數梅花落斷塵。

題盧雅雨觀察出塞集

三年萬里一身遊。莽莽高臺塞草秋。旗影曉翻紅日凍。笳聲夜裂黑鵑愁。索鈴虛警防胡騎。裙屐清吟對楚囚。回首那堪明月夢。二分依舊照揚州。

感興

修樹翳涼蟬。夜露養孤潔。子雀子螳螂。恩仇固分別。一以股倒鉤。一以喙橫截。循環



駭殺機報復怵履輾宛然義俠士不平鎬劍血蟬至死不知疇伺螳螂缺問崔爾胡為袒乃左右設答云人誤猜二物今同穴區區無他腸解道徒哺啜

題臨城公廨壁

車馬所不到山牆帶女蘿逼城河力大弔古鬼雄多陳餘戰死于此吏向雅前散官於枕上過夾亭碑尚在別鮮一摩挲縣郭有普利寺宋藏宗駐蹕賜額命蔡京書夾亭二字碑

偕王太容學博臨城城上晚步

山如龍游如鴈鶩四面盤旋不肯住城居其中震仰盂濕氣滃然壓烟霧登臨恰值崦嵫暮不見人家但見樹樹裏山山形影神隔帷評泊李夫人明朝拂衣便歸去山竟無緣一相遇遇不遇兮君莫悲省却與山生別離

歸自臨城題保陽旅壁

剝啄客入門坐定辭不費四顧壁氤氲鼻觀釀寒味是我入山來袖中之雲氣徐徐問日晷西移樹陰既半起枯竹簾青生竈烟未

又題

兩三點雨地衣斑禪榻光陰戶早闕風約秋聲涼入樹月銜暮氣遠沉山食如許少

寧量腹酌亦無多且駐顏。昨夢細君親口問。自君之出幾時還。

內子已下  
世九年矣

### 寄示大兒臨城山中

棄爾空山裏。晴檐濕翠微。父書無足讀。母墓有誰依。病屢童賒藥。寒偏庫典衣。行厨冬菜熟。弟妹可言饑。

### 大兄將歸誌別二首

不如歸去子規魂。啼到家山第幾村。天各一方分弟妹。地無半畝與兒孫。薄游滋味如嘗酒。垂老光陰合閉門。只是我今愁獨寐。千章風雨樹黃昏。

貧賤方知骨肉尊。檀欒白屋也春溫。生甥可得如其舅。娶婦原因為抱孫。姪廢芸書葱肆去。嫂空蓋篋藥鑪存。最憐麥飯鴉銜處。細雨棠梨冷墓門。

### 重過方順橋有感

優曇一現去來因。照冷今宵月半輪。森森琵琶孤舫夢。離離蛺蝶別枝春。武陵源已不知路。沙吒利為何許人。算到盡頭應破涕。同歸白首總成塵。

### 雨止

阿香掉車龍行師。雨罷脫落鱗之而。山得一雲欲招去。被風吹掛松樹枝。



海珊詩鈔卷第六

烏程 嚴遂成著

論前人詠菊諸詩

偶逢籬花黃。秫田釀正熟。後人雅好事。詠菊積卷軸。首首陶淵明。一身千手目。掛冠見南山。本意屏長觸。反令身後名。為菊所徵逐。生閑得死忙。孤清以衆濁。何如空色相。一物無所欲。欲者心之苗。去苗先去穀。遊于元牝門。死灰而槁木。譬如天地初。原未嘗生菊。

唐帝廟

毀齒受尚書。曰若稽古帝。遙遙遂至今。屏息瞻廟制。古木龍骨枯。頽垣蛇蛻瘞。菜根絡瓜蔓。縱橫見農器。山龍衣飄蕭。苔鎔泥垢敝。緬想諸禪院。紺碧壓山礪。憲宰錢十萬。一朝棄於地。寶玉嵌佛身。灌腦珠舍利。顧茲孕帝都。祠官致私祭。禮惟簡故肅。史以文為累。松雲不剪茨。大哉合帝意。拜罷來村農。手把廟門閉。

明嘉靖建山刹甚衆費皆鉅萬

堯母陵

三阿斗維野。石血流雷電。黃雲上蓋之。聖母此降誕。鬱蔥陳鄴廬。吉卜中妃選。位亞

簡狄次名占訾姬先鍾孕赤龍祥帝範萬古冠母負名世名宋符瑞志載虞

書闕紀讚封樹幸未堙穹隆堂斧觀母名義所諱胡然名其縣嬴政實不學沿襲

陋西漢我來采唐風城隅湧寢殿周遭繚朱垣居中設瑤幔肖像垂禕綸髣髴大帝

面母形像大帝亦見符瑞志尊神上穆肅議以木主奠啟聖合追祀私祭禮則賤不見文武廟累

葉肸饗薦有廢莫敢舉瞻拜發長嘆空留鼎廟碑大哉三字篆

友人許予口妄止之

乖崖遣處女忠武拒名姬古義足師法況今老漸衰長陵嬖宛若不救東方饑但願

乞如願養疴聊自怡戒律守未定浩歌雉朝飛好友輒心喜四出旁求之有目不自

覩而暇為人為友人自謙陋母用相士法相士者取皮母用相馬法相馬者舉肥金篦慎

刮膜點頭防朱衣舍旃復舍旃歸田會有期扶杖攜童孫吳興觀水嬉

月下有懷

明月澹吾慮滿庭無垢氛天光多是水暮氣却非雲屋小農談寂沙空鶴警聞離人

如落葉飄泊不成羣

聞改堂先生將歸維揚銓陞滇郎仍留禮部



六詔指窮邊。崎嶇叱馭前。君恩能息老。臣意在歸田。孰是二千石。而無十萬錢。柳條

沿岸綠。

春穩潞河船。

望溪

方學士

先予告。繼者穆堂師。

臨川座師

同輩復誰在。後生姑避之。江山留老眼。魚鳥討

新詩。二十四橋月。清光照所思。

再可上舍締姻雲間王氏

聽風聽雨片帆孤。到及瓊花開也無。乞得鑑湖偏不戀。

時侍吾師刑部公假歸

醉人春色在淞

鱸

韓上舍

璋

以草花三種相餉各系一詩

紅兒玉杵碎脂田。散作零雲錦洞天。禿袖指尖微露處。子規啼破十三絃。

鳳仙

綠衣倚檻鬢雲輕。金釧銀蟬贖不成。想見嫩瓊

待婢

新出浴。夜闌涼露墮無聲。

玉簪

茸茸鶴頂爛蒸砂。妒月欺霜不着花。王母年如三十許。斑龍扶上紫雲車。

老少年

題安天廟碑為曲陽孫明府

彗出天市掃文昌。輅車冊寶朝金祥。以國與人競舞蹈。誰復一卿惜太常。沙陀異姓

隴西王。始終臣節仇朱梁。當年往援中山國。返旆取道上曲陽。

曲陽亦名上曲陽其實在晉陽曲刻

石未泐鬼神護。掘地爛爛騰幽光。波磔遒勁挾柳骨。獸眼龍角森開張。鷗兔軍聲最  
驍捷。餘事乃能及詞章。游魂夜縋上源驛。老淚秋灑三垂岡。崎嶇禍難示整暇。墨盾  
橫刃磨天揚。孫君汲古獲奇寶。徵詩吳復厲樊遠寄將。嗚呼紇干山雀凍已死。此碑  
歲月猶書唐。

題盧忠烈公祠為傑夫明府

公生歷刼丁龍漢。白晢而文手搏戰。少負殊力抱大志。酒酣常讀張巡岳飛傳。天雄

備軍殺賊多。大礪遮住燕山河。旋鎮鄖襄期盡賊。拘閔其奈中樞何。君不見車箱峽

潰穀城火。前後庸臣受賊侮。擊之以舌不以手。亦不主剿專主撫。胡然下詔徵觀王。

移督用違其所長。我朝龍興膺帝錄。仁義之師來堂堂。以衆克寡小逆大。遂獲死所

于賈庄。在今鉅鹿縣麻衣血裏鏃一斗。地掘故劍青燐光。傑夫求得公故所佩寶劍嗚呼麗牲之碑孫

述祖國論回適臣心苦。榜掠對簿詞不易。驗視經旬肉已腐。食廟應配唐睢陽。問年

恰符宋忠武。岳忠武死時年三十九公與之同

詠樸次樸庭韻

拘尼陀畢鉢羅樹。材大合副工師求。千門萬戶要梁棟。誰築亭子名休休。蔡邕張華



眼界小。咄咄專為琴材謀。深山待價耐孕蓄。不放鍾乳石髓人間流。樸庭之庭苔滿地。日影一過龍螭游。香葉不多掛么鳳。交錯屈鉄森戈矛。閩人成世手植古。得非樂自蒲姑逢伯陵。爽鳩吳君迹名別有託。富貴於我浮雲浮。婆娑其下日吟嘯。琵琶措指聲清悠。安能捷徑騁捷足。朝射東宮夕涓邱。得全我天寶我樸。不巧不美諸侯憂。世間莞枯同一集。何用楚妃竊歎齊女謳。且聽黃鸝攜斗酒。醉鄉九錫綿蠻侯。

寄襄南徐恕齋觀察

余昔與修晉志見明臣轉漕榷鹽復井田諸疏

碧油幢曳戟門煙。鎖鑰三關落眼前。自古晉陽為保障。幾曾汾曲有樓船。開中可以疏鹽政。畫一如何議井田。四面皆山山下路。亭亭楊柳馬連錢。

呈浣桐太守即題舒嘯軒集

陰檐老樹絡藤蘿。許我攜琴幾度過。暑月忽疑霜氣至。清流轉愛惠風多。玉山小队吟情健。金谷懽場酒數苛。一片蓮花池畔月。照人顏色到三阿。

有坐生軒種墨齋倡和疊韻詩

征衣乍浣酒鱗生。一醉留髭笑絕纓。自分口先惟耳學。漫誇張籍未心盲。燕垂趙際清商氣。漢寢唐陵變徵聲。屬以定文吾豈敢。集傳還藉庾蘭成。

成自宣府歸太守留飲出燕秦遊草屬集

與樸庭夜話

月斜枯樹轉庭陰。每到當盃夜已深。老去英雄皆佞佛。世間魚馬亦知音。樓底通內典兼曉音

律

卿言畢竟佳於我。古法安能用至今。流水高山意無限。瀟瀟松石罷彈琴。

### 方伯問亭先生惠七里瀧詩扇次韻賦呈

美德揚清風。袖納烟霞氣。山水受模範。一百二十字。中挾縮地法。咫尺萬里勢。烏龍何牙牙。橘蔗陪坎位。蘄王古將臺。俯壓城之背。林梢湧塔尖。冥濛墮靉靄。公昔消搖游。客星近取譬。高踪彼一時。不可以為例。人人理釣竿。蒼生安所置。補唇晞髮子。此間偶避世。弔古憑虛空。遁作無為謂。得詩雙眼明。宛對桐君峙。

### 鍾山亭藏李陽冰篆為李刑部

秦相斯為玉筋篆。史籀省文蒼頡變。歷東西漢迄于隋。絕筆空無一人半。師承乃有

唐陽冰。隔一千年與相見。俯仰流峙窮元思。上出磻脚甘生之。

篆法有磻脚若生甘之等字却以上出為

脚

直下不倒一縷墨。瓔珞垂露金甌披。種山山人得古本。書易謙卦爻象辭。不師其

辭師其意。謙謙君子良我師。力猛格峻入篆室。號書中虎無媿色。懸之可作座右銘。義取貞吉中心得。惜哉瑯琊鄒嶧之果碑。斯乎斯乎侈頌秦功德。

### 前懷人十六首



齊瓊臺學士

赤城霞氣一囊收。來造□家五鳳樓。改作必諮孔獨頌。威儀當問范長頭。不妨給事亡三篋。安用開行擁八駟。門巷依然寒士素。客來手自瀹茶甌。

吳觀揚觀察

宣今巡府

杯酒斯文莫細論。只留諫草誌君恩。淮揚不與朝廷議。魏郡原為鎖鑰門。竹室銅盤名克副。令阮冠山太史脂田粉碓韻猶存。畜衆妻各膳吾師歸老風流散。賸得如今幾弟昆。庚子同譜

徐讓符刑部

僑居於衛時掌晉陽教

古來師訓最紛綸。別裁方知偽亂真。大意略觀構戶牖。他書可廢充樵薪。甄明我媿臧榮緒。文質今稱賀德仁。壯學深蕪枝葉盛。重開南學見斯人。

王萊堂學使

去年正月之中州試南陽彰德二府即丁內艱以去卜奠歛縣原籍將移家焉

春擁旌旄一渡河。天中陳跡半消磨。幾經黑蟻迷黃蟻。漫說蒼鵠化白鵝。入夢摩敦裝帶在。斷腸陀利落華多。前年悼亡有田到處為家好。何必重尋舊屈沱。

盧雅雨太守

甲子夏五太守至保陽與余同舍為言江蘇戴卯君廉使常鎮馬墨麟觀察維揚唱和事甚相得也今太守遷永平

十年前事說揚州。以我曾同馬戴遊。漫浪不嫌處叔外。浮沉終比伯松優。林深轍迹

逢獅地石峭弓聲射虎秋。別後北平煩坐嘯。遙山如綺帶長流。

### 孫編修約亭

學士風流雅復賢。曩行今止

四字見任昉詩

讓人先醞良那免三升戀。子拙何辭十擲捷。事

有底忙經籍志

分修續文獻通考

月無餘剩菜鹽錢。臣心如水門如市。質庫來言要過年。

### 諸具茨翰林

繡幢高掛客不前

太夫人有千佛幢

且去我今方醉眠。露髮掩頭鮑孤雁

常朝服入朝上戴雨纓帽

搖唇

振足尉寒蟬。丐公徐之腕欲脫。都自非是車空還。東道若逢一夕話。山河表裏騰雲

烟

主晉試回見訪余適佳文安

### 戴卯君太守

時守潯州

流水寒亭碧玉如。紅蕉葉大障腰輿。未航僭耳餐諸菜。已檄潮陽徙鱷魚

鱷魚別有所指酒

侶飄零投轄少。詩情盤礴解衣初。老來喧寂隨緣去。白石巖中有道書。

### 沈勞山徵君

家竹塢甲寅冬扁舟夜訪君善飲必盡室樽空乃止行第六兄寅御行三有孝威孝綽之目恒大笑人又以士龍為比從戴卯

君太守遊粵歸裝滿貯端溪石盞不知金之已盡也

沿溪槳打白萍開。坐月譚深漏鼓催。酣儘一門無我法。詩兼三筆有卿才。擡頭帛倚



張華笑拍手花隨陸賈迴

南海戴素馨花事

投老傭書貧轉甚壯轅重與上金臺

商寶意司馬

泉出山來水亦清清郎何以厭承明  
低頭不作入中想吟嘯雅留方外名  
萬卷藏家多異本四絃上殿善新聲  
沂東莫演春遊劇且待三朝寶錄成

錄未成將復召有以春遊劇賈婆婆事嘲巨孺者竟止

王九思善琵琶以同知被放後因三朝寶

周石帆學士

地逼三清最上層宴歸蓮炬撒紅燈  
曾抽花簞逃何憲又取巾箱奪陸澄  
髯向竹坡誰遍種詩如陣馬每先登

假省觀拜墓

用周羅喉詩必前成事

時典江南試請

陳勾山翰林

卣州門外草痕青落葉深宵旅夢醒  
燬室人言銷愠孽

家中失火

登朝如亦歎沉冥移床

道上詩並三楚閣墨

君去年夏過署阻雨出示郵郵

厲樊榭孝廉

歲客揚州時將謁選

渡江聞說採芳蓀。風月官中不可論。何點勸人全遜節。殷璩竟日畢清言。若徵經義須重席。每憶蕭聲或返魂。君有悼亡姬詩。況是諸賢半零落。瓶花琴斷月黃昏。 彙同集吳綉谷瓶花齋

姚薏田秀才

所居蓮花庄即趙承旨鷗波亭故址

讀書聲出綠楊陰。結得芳鄰趙翰林。八面皆山樓一角。萬花在水月中心。那能病作棲泉鳥。善病屢徵不應未屑貧收諛墓金。便渡江來無好夢。玉人簫不是知音。時客揚州

董芑堂太守

得溪荷花池余妹婿董經遠所居與羣從唱和處芑堂年最少氣適上雅以奕自負余被酒亦得狂名皆與謝三丈若善今風

流雲散或墓木已拱而余老矣芑堂新遷武定

沉沉兵衛寢凝香。巾角彈碁妙擅場。從小便知偉節怒。老來始悔次公狂。余行空池 舊夢無春草。散木。散木文若別字孤墳又夕陽。生怕絕交書不免。竹林例得斥山王。

胡竹巖明府

君丁巳從中丞王師之楚越七年甲寅在黃門帥師學幕二師即君師也兩次俱于錢塘江上登舟作別嗣後不相見今王師

沒帥師戌余亦老矣感慨係之

捉金伐鼓唱開蓬。兩度分襟事則同。江上青峰應念我。鏡中白髮已成翁。申脩有廟原非制。徐晦何人亦可風。回首師門重惆悵。笛聲流怨滿虛空。

題蘭田畫十冊



白梅

不施皂角畫紅粧。對月人居玉照堂。漫說水邊籬落下。嫩寒春曉不聞香。  
老畫梅語 觀用山谷

杏花

手種仙人藥竈芽。群芳會裡醉流霞。老來合把農書讀。三月如何播白沙。  
見肥勝書

梨花

真妃素袖碧紗裙。蝴蝶香迷落洛雲。小試邊鸞折枝手。四分清氣割鵝羣。

玉蘭

漢掌高枝浥露華。香生月冷曉風斜。微蘭有夢人如玉。不數唐昌觀裡花。  
蘭田無子新納妾

薔薇

繡難相似畫偏宜。碎剪紅綃綠間之。只為刺多傷手易。年年扳斷鳳凰枝。

牡丹

滿枝酒氣夢回初。  
李太白畫牡丹事彩筆朝雲那得如。別院紫衣誰作配。歐陽公記蔡公書。

白芍藥

釵莖粉蕊澹春愁。宮面迎風向玉樓。初罷霓裳天上舞。二分明月夢揚州。

### 山茶

占月烘霞艷艷春。並彫鶴頂葉魚鱗。江南池館空零落。畫上屏風與北人。

### 海棠

捲簾側卧薦觴遲。嫋嫋東風赤玉枝。雨泣烟愁描不就。更何人繼許昌詩。

### 水仙

六銖衣薄影亭亭。碎珮寒聲浸畫屏。乞得君王湯沐邑。湘雲湘月弔湘靈。

蘭田楚籍

### 陳勾山太史還朝雨宿望署次原韻

夢醒□天漏六更。蕭蕭涼意枕邊生。七年強半三年病。一別七年兩  
人各已抱病十日之中一日晴。相對秋容憐晚節。已無花樣鬥時英。酒徒燕市今零落。腸斷歌聲是渭城。

### 和勾山邯鄲道上詩

雪洞天橋總渺然。只餘魯酒薄如前。絞車水汲榛中墓。銅鑿人耕雨後田。風俗放鳩猶紀趙。英雄磨劍不歸燕。寒塘無影柔桑綠。淒絕箏聲起暮烟。

### 聞杳霞客保陽却寄

杳霞以秦官解組來客保  
陽眷屬散處蘇濮二州



秦關落葉最飄零。一片離聲不可聽。鴈斷清霜孤子瀆。蓮沉細雨錦帆涇。緣何未老偏多病。賴是無官得獨醒。今夜月明吾入夢。瑤琴理罷水哉亭。

友人之楚旅話

向柳依然恃素情。逢君擁傳楚中行。將吟北渚秋風句。如聽東坡夜雨聲。

語及令兄霞山舊事

時已下世

銅鼓銷沉瀘水渡。金龜流落夜郎城。

吟滇黔懷古詩中述前明平蠻遷謫諸事

酒酣今古無窮事。話

到蝦蟆鼓六更。

書蒼梧王傳

校檜小袴衫。漆帳竿胡旋。排突廝養群。般游營署遍。偷狗青尼園。養驢曜靈殿。裁衣作帽能。執管吹篪便。方其即位初。內外猶嚴憚。一自京口平。天怒人胥怨。投弓笑射。堀懷鳩嫌毛扇。正立眉刺矛。察氣腹剖臍。空輟痛捶之。不讀伊霍傳。織女伺渡河。東阿張幄幔。喁喁卧穿鍼。目光閃如電。拊膺歎劉韞。閤手仰袁粲。袖裏血模糊。拍張手身健。童昏借未知。元服已加冠。地下諫猪王。諸弟當友善。

書東昏侯傳

白魚嘗樂喉斯痛。捕鼠擔幢弱好弄。腰邊傀儡蠡器懸。膝下玲瓏木馬動。二百十六

射雉塲。七寶纏稍作急裝。屏除預起長圍號。棄尸興病何披猖。泥塗水結哀號滿。飛  
仙帳裏香魂嬾。翻身貼地步蓮花。花如人面紅潮暖。簷角琉璃掛玉鈎。釧條琥珀攜  
鈿管。破蒸授灤爾何愚。試看塗壁金為泥。苑樹宮鶯聲斷續。似聞輟哭禿鶯啼。裨販  
成行市令守。白練綠屨人沽酒。魚肉紛紛包裹多。五省黃案歸烏有。解菜悲銜幼女  
腸。縛孤怒射先皇首。香火當年太少恩。高祖子孫無復存。金翅上天搏龍子。襄陽外  
寇兵雲屯。賊來取我我用武。趙鬼能歌魔媼舞。羽儀出邊將山神。鷹犬齊驅媒翳主。  
受降也。召後堂來。步障裏之環角鼓。歡讌吹笙夜未闌。潘妃突遇韓擒虎。

為劉生敬敷題琴心中斷詩二首

枯桐掛壁蒞秋苔。蓋篋無衣甑有埃。忍聽孤兒垂淚問。娘何處去幾時回。  
情文孫楚斷人腸。我亦曾歌薤露行。余有薤露樂府亦悼亡作也省得管甯王駿意。似于此處有  
微長。時敬敷已續膠

懷樸庭信都

別來風物又清和。夢遠東南路不多。一夜雨聲吹到曉。草痕青過葛榮陂。

題文安來數五少尹解壁

駐劄蘇家橋



有蟹無監地。東西二澗間。藕分魚值賤。波齧岬形彎。鳴咽稠桑驛。時甫悼亡嶢木假山。二子皆能文蘇橋明月夜。夜夜照慈顏。母年八十二

從趙北口夜渡西澗

蘆屋烟青水四隈。卧吹銅笛掛帆來。荷香頗與風留戀。封勢全憑月展開。更打雁奴如鼓亂。浪吹魚婢有花堆。空明忽動相湖夢。雉紉龜髯採一回。湖中富水草而無蓴菜

平階弟量移清苑

樓臺近水月先知。莫道相東下子遲。戀劇安繁聊復爾。巧心妍手好為之。方圓要制鴛鴦陣。內外兼吟蟋蟀詩。人食其秋農盡力。雕橋烟柳不勝思。指正定任內事

聞笠亭得松溪

令弟健君先宰是邑

索子翻新摸暗中。荔支重與擘輕紅。三間屋兌東西陸。一曲歌傳大小馮。何不對將華近筦。却如代者踐更同。板輿此去迎無日。瞻灑松楸別殯宮。太夫人前卒于署

聞王谿堂明府青澗計音

秦雲渭樹路迷漫。白頸烏啼夜雨闌。尼子鬚眉良復勝。景文哺齧亦殊觀。一盂麥飯無兒祭。半篋蟲書有婦看。散木謝洲與余皆谿堂中角交亡來琴歇絕。西風老淚不禁寒。

與同年李眉州話汾上舊事兼柬榮金門閩中

彼汾一曲夢華胥。簫鼓樓船事總虛。吏部何心碁射酒。

眉州今官吏部故月王恩範事

廣文不事畫

詩書。

金門前官介休學博

三人涕淚青衫在。

余與李榮別皆相繼居憂

十載生涯白髮餘。同寄賓鴻南向望。

閩山樹斷海雲疎。

題居敬軒二首

存一首

暮祭道庫

道神祭伯皆

茶庫

茶神陸羽

朝勘極書硯書。生涯亦殊好在此味富者不如。

海珊詩鈔卷六終

YORK UNIVERSITY

AUG 02 2001

EAST ASIAN STUDIES



行發局書明文

用適修自校學

詩文評註讀本

秦漢三國文評註讀本

南北朝文評註讀本

唐文評註讀本

宋元明文評註讀本

清文評註讀本

古詩評註讀本

唐詩評註讀本

宋元明詩評註讀本

清詩評註讀本

清代駢文評註讀本

四	三	二	二	二	四	二	二	二	二
冊	冊	冊	冊	冊	冊	冊	冊	冊	冊
一	六	四	四	四	八	五	四	五	四
元	角	角	角	角	角	角	角	角	角

